

宣
統
新
疆
圖
志

新疆圖志卷六十八

水道二

喀什噶爾河

喀什噶爾河爲黃河初源出葱嶺東流是爲葱嶺北河

漢書西域傳河水一源出葱嶺一源出于閼合流東注蒲昌海
水經崑崙墟在西北河水出其東北曲屈流其東南又南入葱
嶺山又從葱嶺出而東北流其一源出于閼國南山北流與葱
嶺所出河合又東注蒲昌海水經注河水重源有三一源西出
捐毒之國葱嶺之上西去休遁二百餘里南屬葱嶺高千里河
源潛發其嶺分爲二水一水西逕休循國南在葱嶺西西域傳
水經皆謂黃河初源有二一爲葱嶺河一爲于閼河以葱嶺河
衆北河南河也山海經崑崙之墟方八百里高萬仞崑崙墟卽
葱嶺也至水經注始言河有三源所謂河源潛發葱嶺一水西
逕休循南又逕難兜國又逕罽賓國北與蜺羅跂禰水同注雷

嘉海乃葱嶺西流之水入葱嶺而東流者爲中國河初源法顯
西域記商彌國境東北踰山越國行七百餘里至波謎羅川東
西千餘里南北百餘里狹隘之處不踰十里據兩雪山間中有
大龍池東西三百餘里南北五十餘里據大蔥嶺內當瞻部洲
中海國圖志葱嶺北河出喀什噶爾城西千餘里之大龍池是
爲黃河初源水道記和什庫珠克嶺有大池曰哈喇庫勒周數
百里登阿賴山巔以望銀濤一片上涵天光池東出水東流池
西出水西流卽將軍兆惠蹟大小和卓木之地疏附鄉土志葱
嶺爲縣境諸山之祖城西千餘里爲葱嶺之巔其最高處五峯
環峙積雪不消蓋卽崑崙五城也惟東北缺一口仍塞以平頂
石子砂梁厚約五十里望之如堤隍回語爲阿賴依其名不聞
蓋卽指此五峯
之中冰雪消融滙爲巨浸長約百五六十里寬可七八十里中
有小山如島回語謂之哈喇庫爾猶言黑水海子也蓋卽西域
記之大龍池釋典之阿耨達池也池中風烈波高銀濤雪浪上

涵天光高瀟萬仞之巔隱爲衆水之天潢四面卻無顯出之水
諸書謂流爲西大水者非是亦有潮汐惟無常期近池爲阿賴
依稍平餘均荒復阻絕人未能近接西北峯一支北行爲黑孜
爾拉提山是爲北幹又西北行連起三峯曰黑孜冷山曰綠野
山曰托合巧山袤延三百餘里冰雪凝積崢嶸極目山東北卽
烏蘇河源再北由帖列克達坂折而東行爲通布倫嶺一名屯木倫鄉
土志謂大龍池無顯出之水三峯在哈喇庫勒西北烏蘭烏蘇
河源在三峯之東北與前人雅璊雅爾出大龍池東流之說稍
異考之回部圖中俄界圖屯木倫在葱嶺之東東北行踰嶺爲
阿賴嶺嶺南爲克則勒蘇河河南爲後阿賴嶺再南爲坎甫曼
嶺再南爲穆科蘇河源與克則勒蘇均西流穆科蘇河源之東
爲喀喇庫勒泊泊之東爲葱嶺正幹嶺東東流者爲南北河之
源嶺西西流者爲克則勒蘇穆科蘇之源喀喇庫勒東踰喀喇
租庫嶺卽喀喇租庫河源但爲嶺所隔迥不相通喀喇庫勒西

北面平迤無峰巒之阻殆鄉土志所謂東北缺一口仍塞以平頂沙梁者沙梁之北偏東爲瑪爾堪蘇河源再東北隔一嶺爲赫色勒初源滙爲克則勒蘇河阿賴嶺南一河與赫色勒初源東西相通西人亦謂之克則勒蘇西域記所謂大龍池東西分流者定卽指此欲考葱嶺東西水源必自喀喇庫勒始南北河之源亦莫不胚胎於此大荒西經西北海之外大荒之隅有山而不合名曰不周負子西山經長沙之山又西北三百七十里曰不周之山穆王西征至於崑崙於南北河源靡不觀歷當時必有圖經流傳屈騷云忽吾行此流沙兮遵赤水而容與路不周以左轉兮指西海以爲期赤水卽赫色勒不周卽喀喇庫勒不周西北有山曰阿賴依卽不周負子由流沙西行必遵赤水經喀喇庫勒左轉而後能達西海以今圖證之無不昭合屈子當日非按圖而求安知其爲左轉也穆王時東西相通至秦皇築長城焚圖書復行閉塞論者謂張騫開西域陋矣舊說或語

焉而不能詳卽詳矣閱者或不能盡解必博觀諸圖以融會貫通之庶幾了然心目地文地理豈易言哉

北河三源一源出帖列克達坂東格爾瑪達坂滙爲廓克蘇河又東三峯黑子冷蘇來滙爲奴拉蘇卽赫色勒河是爲烏蘭烏蘇上游

北河源出葱嶺萬峰玉立有一峯卽有一澗有一澗卽有一源本難以數計姑就源之滙爲河者言之舊說分爲南北二源今考瑪爾堪蘇一源尙遠於烏蘭烏蘇雅瑪雅爾自應列爲一源合之南北二源而得三焉烏蘭烏蘇源亦有二源一發帖列克達坂山頂東格爾瑪山頂合流爲奴拉蘇一發三峯黑子冷蘇入奴拉蘇卽赫色勒河也水道記阿賴東南爲喀卜喀山亦曰赫色勒嶺四山注水至嶺下潄爲小池嶺赤而黃河色赤蒙古語赤爲烏蘇是曰烏蘭烏蘇河回語赤爲赫色勒又曰赫色勒河赫色勒嶺水東流百二十里逕木克渾又百里逕提干又百二

十里逕愛依阿提嶺北又百二十里逕康什壩又百里逕別什托海有通布倫嶺水自西北來匯通布倫嶺水又東南流四十里經努拉又五十里經卡里他布拉克有一水自北來匯通布倫嶺水又東南流七十里經伊亨又東南流十五里經喇哈喇喀喇又東南十里經喇哈喇口子有一水自北來匯又東南六十里經稍里托海又東南十里經烏魯胡喀特有一水自北來匯又東南七十里經倭胡蘇魯又東南四十里經坎鐵列克又東南五十里經怕哈布拉克又東南四十里漢約換南與赫色勒嶺水匯新疆圖說烏蘭烏蘇河源出喀什噶爾城西岳瓦什布魯特部落通布倫嶺南特起三峯曰黑子冷山曰綠野山曰托合巧山三峯之北懸崖數仞瀑布飛流隆冬不竭黑子冷峯一泉尤大流至山麓合爲一川西人名曰黑子冷蘇又云西域志有赫色勒河爲北河北源卽唐之赤河赤河來自疏勒西葛祿嶺疏附鄉土志烏蘭烏蘇河發源城西九百六十里通布倫

嶺之南而三峯之說悉同新疆圖說謂卽華嚴音義之徙多河唐之赤河西域志之赫色勒河東南流九十里又東北流八十里至伊爾克什坦西人名克則勒蘇河其經過冰嶺或名阿拉爾古或稱阿魯干工故伊犁志去河源出自阿拉古山至是愛坎什唐木水自南而北入焉爲中俄分界處北河北源諸說紛歧今人頭昏目眩取圖證說稍覺了然而圖亦不足盡信述葱嶺北河者始於西域傳水經注至水道記復取舊說證以親歷殊具苦心然以赫色勒嶺屬之喀卜喀山不無可疑新圖瑪爾堪蘇河在西瑪爾幹山在東喀卜喀山更在瑪爾幹山之東其北卽烏蘭烏蘇河經流水道記稱赫色勒嶺水東流五百六十里始與通布倫水會鄉土志由通布倫嶺發源至疏附城僅九百六十里喀卜喀山在城西五百五十里喀卜喀果卽赫色勒嶺則出源東流五百六十里已過疏附縣城東通布倫一源在城西數百里外安能與之相會徐氏以北源歸之赫色勒通布

倫嶺誠是以赫色勒阿賴屬之喀卜喀山則東西易位矣水道記羅布淖爾所受水第一圖通布倫一源滙喀卜喀西來之水在漢約換南托什別海東北漢約換卽鄉土志西門一路之安鳩安一作堪朱干於漢約換音相近東距喀浪圭內卡五十里徧考各圖托什別海漢約換之南岸支河張圖僅有東流阿依阿奇一水疏附縣圖亦有阿依阿奇水其流又由南而北均傍喀卜喀山別無西來大水流入可與喀卜喀一源相等者雖知其失實而無以正之及覽沙大臣勘界日記圖說始知喀卜喀者乃噶布噶之誤勘界日記屯木倫山下向北行三十里上達坂頂順窄澗三十餘里下至廓克蘇河岸由此橫渡廓克蘇河上小達坂北行三十里至以克則山口向北行二十里至以克山頂過山下五里至廓克蘇河岸河有二源一出帖列克山頂一出東格爾瑪山頂至此各出山口合流爲廓克蘇河向東過諸山峽入紅水名可自勒蘇卽克則勒蘇又東流至伊爾克池

他木河以東匯大河名奴拉蘇列克達坂謂葱嶺北河黃河源是也
又由廓克蘇向北行六十里至東格爾瑪又名哈喇別里達坂
絕頂中俄兩國共立牌博向西南捷徑出山口仍回至廓克蘇
河岸住息勘界圖帖列克達坂列克達坂一源發帖列克達坂山頂東南
流有碎歪得水古魯太瑪水自西來入之又東南流經嘎布嘎
又一水自西來入之又東南流東格爾瑪一源發東格爾瑪山
頂三水合而西南流至克則克達坂卡倫西北與帖列克一源
相匯既匯爲廓克蘇河又東南流有可自勒蘇水嘎他拉克水
自西來入之又東南流有一水自西來入之又東南流爲依爾
克什他木有中俄鄂博即有一水自西南來入之卽依爾克什
他木水也凱爾滿庫魯達坂南亦有一水自北來入之又東流
有柯希額得克蘇水自北來入之又東爲奴拉蘇河又東流有
哈拉帖列克蘇水自西北來入之哈拉帖列克蘇在業干卡倫
西有三源一源自哈拉卡拉山頂東南流一源自克斯達爾達

坂山頂南流一源自塔拉庫勒達坂山頂南流匯爲一河又有
二小水自西來匯爲哈拉帖列克蘇河東南流入於奴拉蘇大
河又東流至那克拉卡倫南有薩哈拉蘇自南來入之又東經
烏魯恰克提南有一水自北來入之又東有哈吐瓦克水發源
薩瓦雅爾得山頂南流有于虛他什水自東來合而東南流來
入之奴拉蘇折向東南流卽烏蘭烏蘇上游也以此考之帖列
克達灣卽帖列克達坂帖列克卽赫色勒帖列克東格爾瑪二
源初合爲廓蘇克卽克則勒蘇廓克蘇西岸一小水循小水西
行折而西南行卽屯木倫屯木倫卽通布倫由屯木倫折而西
行卽入阿來之路阿來卽阿賴依阿賴古奴拉蘇卽烏蘭烏蘇
昭然若發蒙一切舊說可掃而空之沙大臣有功於北河北源
大矣哉至三峯黑子冷蘇之說尙在屯木倫以西沙大臣果親
歷其地必有精圖繪此奇境惜哉

又東依爾克什他木河

一作布爾克達木河
本作依爾克達木

自南來注之又東柯希額得克

蘇水自北來注之

依爾克什他木河在奴拉蘇河之南源發哈拉卡拉南山柯希額得克蘇水源出哈拉卡拉山下在奴拉蘇河北勘界日記由業干向西行四十里過柯希額得克蘇此水發源北山至出山口匯奴拉蘇大河渡大河西行二十里至依爾克什他木即官圖紅綫之依爾克什他木河亦即卡倫單之依爾克什唐是也有水源由迤南雪山中出而北流至此出口入奴拉蘇大河按此二河爲新疆圖說所無鄉土志作愛坎什唐木水疏附縣圖於伊爾克什塔穆河僅列牌博名而不見河謹據勘界日記及

新圖補入

又東業干河

一作業干一作業干

自北來注之

業干河卽哈拉帖列克蘇水也疏附縣鄉土志赫色勒河入界後東北流百餘里業干河自北而南入焉新圖克斯達爾牌博南麓有水初發二源西南匯而爲一南流復東南流入於赫色

勒河而不言水名卽業干河也新疆圖說業根水在城西六百四十里其源出布魯特岳瓦什部落喀喇鐵列克山東北流至納格恰的卡與德必楚克河會勘界圖由業干向西行卽過哈拉帖列克蘇再西南行四十里過柯希額得克蘇水此水源發北山哈拉卡拉克斯達爾達坂塔拉勒達坂大小五源合而東南流卽業干河之上游也

又東薩烏雅河匯玉區塔什水自北來注之爲得爾必楚克河

鄉土志業干河入赫色勒河又東流六十里至烏魯克恰提玉區塔什河自東而南入焉至此名得爾必楚克河又玉區塔什河發源於城西北六百五十里冰嶺下一名吐子阿蘇一名哈拉瑪阿蘇兩水均南流合爲一川約八十里至玉區塔什與塔勒格依水合又西流三十里色丹水自北而南入焉又西南流三十里阿來庫里水自東北而西南入焉又西南流二十里與薩烏雅河會薩烏雅河發源於城西北八百四十里額得格訥

部落薩瓦雅爾得雪山之西南東南流繞伊格則克山之東一百八十餘里與玉區塔什河會流而南五十里至烏魯克恰提入於得爾必楚克河新疆圖說玉區塔什水在城西七百里源出西布魯特額得格訥部落南山東南流一百三十里與薩烏雅水會薩烏雅水在城西七百里源出布魯特岳瓦什部落冰嶺東南流一百五十里至本莊又流六十里至烏魯克恰提卡與得爾必楚克河會勘界日記由葉雷干向西行入山五十里又行二十里兩岸狹窄爛石塞道六十里至于墟他什口山頂有水源清冷可鑑卽此水也源發吐子阿蘇達坂東山峽中再東有二源同東南流又有三小水源發哈拉瑪爾蘇達坂塔拉格依達坂色丹達坂南山峽中自北來入之又東南流會薩烏雅水入得爾必楚克河按新疆圖說謂得爾必楚克河赫色勒河其實只一河以音相近西域圖志赫色勒郭勒源出北山麓東南流會特爾墨楚克河郭勒入雅滿雅爾誇斯騰特爾墨楚

克郭勒在赫色勒郭勒南五里西北山下同源異流東南流二百里而復合特爾墨楚克河應卽得爾必楚克河與赫色勒一河但分上下流耳西域圖志誤爲兩河又謂入雅滿雅河均與今異以上經流支流河名參攷衆說仍據沙大臣勘界記圖以爲先後次第

一源出喀喇庫勒北東流爲闊拜里河又東爲瑪爾堪蘇河即瑪納斯河和色爾河自西南來注之又東爲烏蘭烏蘇河

瑪爾堪蘇河源出喀喇庫勒泊之北經烏赤別里山口牌博西南喀喇塔達克牌博之西入界其發源之遠過於赫色勒河眞葱嶺以來第一流也帕米爾形勢道里圖東流入界後謂之闊拜里河又東北流和色爾河自南來入之和色爾河源出喀喇庫庫東北初二源東北流又納南來一小水入於瑪爾堪蘇河又東北流入烏蘭烏蘇河新疆圖說哈喇特山山南多松柏沙哈爾水出其北山南之水均流入瑪納坎河又瑪納坎水亦名

和色爾河在城西四百八十里源出喀什噶爾正西希布察克布魯特部落黑子爾拉特山下北流一百餘里至色拜拉可爾又流九十餘里至托古斯布拉克入境折而東北流一百二十里有明鐵蓋水自南來入之又西流一百至瑪納坎莊又流五十里與得爾必楚克河會鄉土志瑪納坎河發源於城西九百二十里哈拉提錦部落黑孜爾拉提冰嶺之南石峽中飛泉數道至山麓合爲一川東流經阿賴依沙梁之北六十餘里入縣境與哈喇庫爾相去約五十里卽西域志所云池東派一大水東北至疏勒國西界與徙多河合而東者也又東流五十里入色拜拉可爾長約三十餘里寬約十餘里又東流六十里瑪納爾堪蘇自南而北入焉因名瑪納坎河又東北流五十里至托古斯布拉哈折而東流四十里阿依阿提水自南而北行百餘里入焉又東北流繞瑪納坎山之南二百餘里阿其貝利又折而北曲流五十里至別什托海西與得爾必楚克河合流而東

水道記得爾必楚克河東南流逕哈朗歸

歸和朗之地
府山陰故名

卡倫西有小

水自南流入之鄉土志謂瑪爾堪蘇源經喀喇庫勒沙梁之北
卽池東派一大水與帕米爾形勢道里圖合非親歷其境不能
道也新疆圖說謂瑪爾堪蘇卽和色爾河新圖以和色爾爲瑪
爾堪蘇之支水卽張圖之明鐵蓋水也瑪納坎河以瑪納坎山
得名卽新圖之瑪爾幹山也瑪納坎水皆東北流新疆圖說謂
又西流誤甚蓋瑪爾幹出瑪納坎莊均在其東若西流是去之
愈遠矣喀什噶爾以西諸大水無西流者瑪爾堪蘇河旣入之
後張圖又謂之克則勒蘇河實得爾必楚克河之下流也鄉土
志謂赫色勒河入界後東流一百六十餘里後爲得爾必楚克
河又東南流四百五十里爲烏蘭烏蘇河新疆圖說謂山水源
東流七百五十餘里至喀什噶爾木什回莊南始爲烏蘭烏蘇
河與水道記所敘互異二河起止殊難強斷今依新圖以瑪爾
堪蘇河旣入之後爲烏蘭烏蘇河

又東鐵列克水又東麻喇托海水均自北來注之

鐵列克水在鐵列克莊南山峽中逕也斯克奇東逾山入於河
新疆圖說鐵列克水在城西四百八十里源出布魯特岳瓦什
部落北冰嶺南流五十餘里至也斯克奇又流七十里與得必
楚克河會又麻喇托海水源出北山泉穴南流一百一十里與
德必楚克河會

又東阿其貝利水又東別什托海水均自北來注之

新疆圖說阿其貝利水在城西三百七十里源出本卡南山北
流一百二十里與得必楚克河會別什托海水在城西三百里
源出烏魯瓦特山北流五十里至阿伊阿奇外卡又曲流一百
二十里與得必楚克河會按新圖謹載阿奇水自南而北流於
鐵列克麻喇托海阿其貝利別什托海四水均未繪入阿奇竊
疑爲阿伊河之誤說詳下阿伊河

又東坎素水自北來注之

坎素水在庫斯渾水之西章布拉克卡倫之南鄉土志坎素河一名科克甲堪蘇發源於城西四百七十里古立鐵梗之南東南流繞康山之陽百餘里泉流數道合而爲一至坎素折而南流七十里入於烏蘭烏蘇河新疆圖說堪蘇水在城西二百八十里其源出布魯特岳瓦什部落康山南流八十里與德必楚克河會

又東庫斯渾水合喀喇克瑪匝爾海自西北來注之

庫斯渾水發源格拉格依牌博南克子圖山西麓海子沿庫斯庫山西南麓東南流喀喇克瑪匝爾河發源克子圖山西南麓海子循庫斯渾山東北麓南流入庫斯渾水合而東南流入烏蘭烏蘇河新疆圖說伊阿奇阿提水在城西北二百里源出恰哈瑪克西山東南流一百五十里至康素牌莊又流五十里至喀浪圭又流二十里與庫斯渾水會庫斯渾水在城西四百四十里源出布魯特岳瓦什部落北山東南流三百里至喀浪圭

卡倫南又南流五十里與烏蘭烏蘇河會疏附鄉土志庫斯渾山在城西北三百八十里由吐子阿蘇達坂分支東南行繞葉雷河南突起一峯高十餘里山北皆石坂險峻山南谷間有松柏庫斯渾水出其西麓伊阿奇水出其東麓又伊阿奇水發源城西三百餘里庫斯渾山東麓南流七十里至而內克又東南流九十里至坎吉貝折而南流四十里入於庫斯渾河庫斯渾河發源於城西一百六十里庫斯渾山西麓南流五十里至鴉哈哈提折而東南流二百餘里至喀朗圭與伊阿奇水合而南流七十里入於烏蘭烏蘇河按喀喇克瑪匝爾河卽張圖之伊阿奇阿提水鄉土志之伊阿奇水入於庫斯渾新圖亦合又東阿依河自東而南來注之

阿依河源發於喀卜喀山兩水夾山東流喀卜喀澗流皆入之南一支經阿伊阿提之南東流與北支滙又東流折而東北流入烏蘭烏蘇河鄉土志阿依河發源於城西四百餘里喀卜喀

山之東諸峯雪水會流成河東北流百餘里至阿依阿奇

一作阿依阿

又東流百餘里至標里托海又北流繞勒秦烏巴什山之西北

五十里入於烏蘭烏蘇河按新圖有阿奇水發源於阿依阿奇

山東麓烏魯瓦特北麓二源合流自南而北入烏蘭烏蘇河張

圖及鄉土志均無此水初疑爲阿依阿提水細校鄉土志另有

阿依阿提水爲瑪納坎河之支水尙在瑪爾幹山之北非新圖

之阿奇水明矣鄉土志額伊爾阿提山

一作阿特山
名阿依阿奇

在城西三百四

十里由喀卜喀山分支經明鐵蓋達坂東行長百餘里高可七

八里阿依河繞其南阿奇水繞其北又喀卜喀山在城西五百

五十里東西長百六七十里石壁冰梯上插霄漢阿依河出其

東是阿依河源出喀卜喀山本有兩源合言之則爲阿依阿奇

均自西而東繞勒秦烏巴什山之西北始入於烏蘭烏蘇河張

圖有一水源流相同而不著名卽阿依河也新圖有阿奇水疏

附縣圖有阿伊阿奇水均作北流入於烏蘭烏蘇與張圖及鄉

土志皆不合非另有一水卽將額伊爾阿特山北之阿奇水誤東流爲北流也

又東木什水自北來注之又東過疏勒府城爲喀什噶爾河

阿依河旣入烏蘭烏蘇東流逕勒秦烏巴什山北又東逕明瑤路南又東逕木什素魯克莊南有木什水自北來入之又東至托古薩克東北分一支繞疏勒府城之南東流至和色爾莊東北止焉正河東流逕疏附縣城之南是爲喀什噶爾河西域圖志木什謬斯騰在喀什噶爾城北源出赫色勒郭勒北山中東南流過城北會赫色勒郭勒入雅璊雅爾又特們郭勒在木什北源出北山東西二源合而東南流入木什謬斯騰又喀什噶爾達里雅在喀什噶爾城南五十里卽雅璊雅爾之下流西北會赫色勒特爾墨楚克兩河之水又東行五百里逕巴爾楚克城南又東行六百里北會阿克蘇郭勒南會葉爾羌謬斯騰和闐郭勒入塔里木郭勒水道記烏蘭烏蘇河又東南流五十里

逕明瑤地有舊卡倫又東南四十里逕木什素魯克莊南有木什水發木什莊西山三泉同流復分爲二一東流溉木什莊田一南流八十里來滙新疆識畧木什莊在喀什噶爾城西北八十里有水出回莊西南注大河又東經城南是爲和色爾河河水過回城南分渠一至和色爾布依莊一至牌素巴特莊皆止不流按西域圖志猶謂喀什噶爾河爲雅璊雅爾之下流蓋雅璊雅爾本北河之南源當時必入於北河今已不能達矣水道記已言之與張圖及鄉土志皆合新疆識略所稱和巴爾海卽城南分支也北河至喀什噶爾城北兩岸所開支渠甚多鄉土志烏蘭烏蘇出木素魯克回莊以下分爲數大渠其正河南流六十餘里又折而東於城西四十里別分一支經城北正支經城南至城東七里許仍合爲一由漢城北迤邐東去入夏諸山雪水曾流而下實爲巨川疏勒伽師巴楚皆賴以灌溉焉

又東圖舒克塔什河合伊蘭烏瓦斯河自北來注之

圖舒克塔什河源發蘇岳克冰嶺南兩水東南流匯爲托雷河
經鐵蓋山西南麓有察克瑪克河源發烏圖魯牌博西南冰嶺
下經喀喇鐵列克山西麓西南流至牌素爾罕卡倫西合流是
爲圖舒克塔什河新疆圖說圖舒克塔什河在城西北一百二
十六里源出布魯特冲巴噶什部落素額克冰嶺下南流九十
里有設卡的水自西入之又托衣水自東北入之又南流六十
里有吐子皮阿蘇水自西入之又南流二十五里有圖魯阿提
水黑子庫爾水合流自北入之又南流二十五里至恰哈瑪克
卡東又南流五十里至牌素霍爾罕外卡又流八十里至冲鐵
克卡外又東流六十里至圖舒克塔什內卡倫至此名圖舒克
塔什河又東流六十里分作兩支南支爲泉河東流一百二十
里至伯什克勒木莊分蔭地畝北支東流一百六十五里至阿
斯圖阿爾圖什莊又東流一百八十里至格達良南與烏蘭烏
蘇河會鄉土志圖舒克塔什河發源於城西五百九十里蘇約

克達坂之南兩山峽中南流九十里至葉雷河口葉雷水

一名乙尼自

西南山內出東北流百餘里入焉又折而東南流百三十里至

克子冷蘇羅桿

一名黑托

允水發源於圖魯阿提西合黑子庫爾

水南流百餘里入焉又南流五十里至恰哈瑪克卽察克瑪克

河有塔司塔爾水發源於黑子庫爾西南流百三十里入焉折

而東流經牌素霍罕九十里至巴依和登哈那特桿河發源於

倭圖魯南流百七十里入焉又南流四十里至冲鐵列克折而

東流六十里至圖舒克塔什出口河南別分一支東南流名

白水河北二十里至伯什克勒木莊伏焉其正支依山東流五

十里至玉斯圖阿圖爾什又東南流百六十里至格達良與烏

蘭烏蘇河會而東出龍口橋按圖舒塔什河上流新疆圖說支

河五鄉土志支河四以勘界圖證之此河初源發蘇約克達坂

山頂名克每斯蘇東爲圖魯阿提水源發圖魯阿提山頂又東

爲恰克瑪克河源發黑子庫爾達坂新疆圖說之設卡的水卽

庫瑪爾塔水在蘇約克之西托雲形似黃土堆一作托尤圖魯
阿提水經其西因以名水卽新疆圖說圖魯阿提水與黑子庫
爾水合流者卽恰克瑪克河也恰克瑪克源發黑子庫爾達坂
亦卽鄉土志之塔什塔爾水也惟吐子阿蘇水僅見新疆圖說
而鄉土志勘界圖均不載勘界圖於葉雷河口稍東北尙有阿
依蘭蘇水自東流入亦爲新疆圖說鄉土志所不載此河上流
惟勘界圖最詳自應據以爲定伊蘭烏瓦斯河發源疏附城北
帖列克牌博南托古里買特山峽內泉流紛注不止一源出山
峽南流復東南流入圖舒克塔什河新疆圖說伊蘭烏瓦斯河
在疏附城東北百二十里其源出布魯特沖巴噶什部落托古
里買特南流三十里至格思有和堅特水博孜愛格爾水黑皮
恰克水自北入之又從石峽中曲流十里至格塔外卡與峽口
泉水合流五十里入伊蘭烏瓦斯內卡倫至此分爲兩支一經
阿爾湖莊巴爾昌卡一帶止不流一經阿斯圖莊與圖舒克塔

什河會鄉土志伊蘭烏瓦斯河發源於城東北二百七十里托蓋爾買丹即托古山峽中南流三十里至格斯從石峽中曲流十餘里至日格塔峽口別有飛泉數道會流而南五十里伊蘭烏瓦斯出山口東分一支由阿爾莊出巴爾昌其正支經阿爾湖而南三十里入哈圖舒克塔什河新圖以圖舒克塔什河入喀什噶爾其東一河發源於帖列克牌博南麓東南流經伯廓新山之西而不著名卽伊蘭烏瓦斯河也惟逕入北河而不匯圖舒克塔什河似誤鄉土志新疆圖說均謂伊蘭烏瓦斯入圖舒克塔什河言之鑿鑿不可易也

吉明水 新疆圖說吉明水在城西二百六十里其源出希布察克部落吉明梗山東流八十餘里至博斯塘戈壁不流

牌素特大渠 新疆圖說牌素特大渠在城南五里其源從烏蘭烏蘇河分支繞托古薩古莊入境至牌素特莊分蔭地畝

素胡爾水 新疆圖說素胡爾水在城西南四百里其源出奈

曼部落畢勒達坂東山東流二百餘里至博斯塘戈壁不流

和色爾布依大渠 新疆圖說和色爾布依大渠在城南五里其源從烏蘭烏蘇河分支經托古薩克莊入塘至和色爾布依莊分蔭地畝

庫車水 新疆圖說庫車水在城東南一百里其源從罕愛里克大渠分支東南流至岳普爾湖莊戈壁不流

伊斯里克河 新疆圖說伊斯里克河在疏附縣城北一百一十四里其源出布魯特沖巴噶什部落帖列提冰山南流一百里有克子努庫水自北入之又南流七十里至克科外卡西又南流六十里至伊斯里克卡又南流二十餘里伏於山溝

賽爾滿渠 新疆圖說賽爾滿渠在城北里許其源從烏蘭烏蘇河分支繞回城西北一帶至七里橋東仍與烏蘭烏蘇河會

阿爾瓦特大渠 新疆圖說阿爾瓦特大渠在城西北十里其源從烏蘭烏蘇分支經霍爾罕莊伯什克勒木莊至阿爾特莊分

蔭地畝

烏水 疏附鄉土志烏水發源於城西南四百八十里希布察克部落波羅可孜山之東繞烏魯瓦特山之北東流一百九十里至梭可樂科又北流三十里至博斯塘帖列克之東伏於沙磧

吉水 疏附鄉土志吉水發源於城西四百一十里希布察克部落吉門梗由山峽中出東流八十餘里繞博斯塘帖列克之北至大戈壁中伏於沙磧

哲克得布拉克 西域圖志哲克得布拉克在齊都伯西南四十里源出北山南麓按西域圖志天山南路第四圖齊都伯在喀什噶爾東境新圖無此水

哈喇布拉克 西域圖志哈喇布拉克在哲克得布拉克西南四十里源出北山南麓按新圖無此水

博羅和碩郭勒 西域圖志博羅和碩郭勒在玉斯屯阿喇圖什

西南二十里源出西北山中東南過阿喇圖什而止不通大河
按此河與圖舒塔什河下游之白水河相近或謂卽白水河新
圖無此水

倭圖魯蘇水 勘界圖在克倭圖魯達坂東自西南折而東流
其其克那克水 勘界圖其其克那克水在博圖瑪拉克水西
源出北山山谷南流

博圖瑪拉克水 勘界圖在其其克那克水東出北山山谷南
流

克子克蘇水 勘界圖克子克蘇在烏依他拉卡倫南一大源
出卡倫北山山峽中東南流克子克蘇自西而東流入又東南
流雅滿塔爾蘇自東北來入之又東流帖列克河匯一水自東
北來入之又東南流其其克那克水自北來入之又東流有一
水自東南來入之又東流博圖瑪那克水自北來入之又東經
阿拉于湖依什噶爾提兩卡倫東南自吐子阿蘇達坂西麓止

共收南北小水六不入大河

以上疏勒府疏附縣境內小水

又東入伽師縣境出龍口橋分支爲洪水河

舊疏勒州東南境今割爲伽師縣河出龍口橋向南分支爲洪水河東流入沙灘正河逕瑪喇巴什素里克玉代里克驛南洪水逕駱駝脖子北出疏勒府境新疆圖說洪水在縣城西四十二里其源從龍口橋東二十里由烏蘭烏蘇分支東流至駱駝苑子入境東流七十里分二支其北一支曲折流一百六十里至屈爾蓋莊西與烏蘭烏蘇河會又烏蘭烏蘇河至喀什噶爾木什回莊南又東流一百餘里逕回城南漢城之北迤邐東去三百餘里至龍口橋又東流一百二十餘里至玉代里克驛入瑪城界瑪城巴什噶今改巴楚州里代克驛在疏勒府城東四百一十里烏蘭烏蘇自發源至此據新疆圖說謂一千二百七十七餘里鄉土志僅及千里未知孰是

按伽師境內爲葱嶺北河南北二源之下游一切支水均入於烏蘭烏蘇雅瑪雅爾茲不另列

又東入巴楚州境又東與洪水河合其北河故道在洪水河北斷流已久

新疆圖說烏蘭烏蘇在瑪喇巴什廳城北數里從卡拉克沁驛西樹林地方入境入境後東流六十餘里向北分一渠至卡拉克沁莊止又東向南分一渠至屈爾蓋驛西止洪水入境後東流約七十里向東南分一渠逕河沿子腰站北漸東北流經洪波戈子莊東北又分二渠一至東城莊止一至賽拉古各莊止洪水河東北流折北流至屈爾蓋莊西北與北河合巴楚州圖洪河故道在洪河北今已湮渴而葱嶺北河故道更在今洪水河東北百餘里其上流不可考入州境後東北流二百餘里又東流經排山口卡倫南又經上棟槽下棟槽北逼近北山又東北流經舊村墟南圖木舒克北又東北經古騰州城南至庫底

庫勒東南始與今北河支流接故道雖存斷流已久亦考古者所當知也巴楚州南境湖蕩紛歧新舊各渠縱橫如繡南北河紆屈往復出沒隱現令人猝不能辨非筆墨所能詳述必閱精圖始能了然

又東過巴楚州城北又東折而南流入草湖逕大戈壁與葱嶺南河會

河逕州城西北分二渠北流又東至察巴克莊東折而南流逕烏梁洛可山西南水勢漸濶又南入麻札湖一作麻湖湖內二水南流經克拉甫山西至卡拉塔克台北二水東南流經克拉甫山東至巴爾楚克台東均入南河烏蘭烏蘇河至麻札湖出東北流不數里向東開二渠南渠經賽子可莊新地莊東流至羊廠東止北渠經塔哈木莊至雅哈庫圖克莊北止正河復東流至車底莊東北入於車底庫勒復由庫勒山東北流逕雅哈庫圖克驛東分一渠北流經色瓦特驛西入烏什界正河逕色瓦特

南東流逕沙山北入大戈壁共三百餘里至噶巴克阿克集北入葱嶺南河新疆圖說烏蘭烏蘇入境東流百九十里至瑪喇巴什城北又東流七十二里至察巴克驛東折而南流五十里至瑪札莊草湖曲折流二百里至色瓦特驛自此經大戈壁又流三百餘里至噶巴克阿克集地方與葱嶺南河會

按巴楚州南境爲葱嶺南北二河下游其烏果洛可南瑪札草湖乃南北二河通流咽喉所有支水已叙入北河南河矣一源出哈喇租庫嶺東爲哈喇租庫河又東流爲圖巴里克河又

東曰雅璊雅爾

一作雅河

西域回部圖哈喇庫勒東爲哈喇租庫

即雅爾

嶺踰嶺而東卽哈

喇租庫河雅璊雅爾之初源也東流有支子里即克河發源烏孜別里北麓東北流來入之帕米爾形勢道里圖布咱的河即支子里即克也其東多一源曰雅朗特河入於布咱的又東流爲圖巴里克河水道記自庫勒出東流百里經察哈爾阿勒爾

又東流百里經哈喇塔什嶺北烏魯噶喇嶺南是曰圖巴里克
河又東流九十里經格斯阿爾雅又東流百里經庫依魯克又
東流百二十五里經僞塔克山北又東流六十里逕伊勒古楚
卡倫北又東經逕塔什巴里克莊北是曰雅瑪雅爾諤斯騰回
人謂厭棄曰雅瑪坎曰雅爾河深難渡以厭爲詞皇輿西域圖
志哈喇庫勒卽雅瑪雅爾諤斯騰上流在烏魯阿喇特達巴即烏魯
圖西北有二源出北山中合流南行至此停瀦成澤周圍百餘
里東出爲雅瑪雅爾疏附縣鄉土志雅瑪雅爾河其源有三發
於城西南六百六十里之坎什拜冰嶺中瀑布數道從萬仞峯
巔奔流而下如銀濤白練入於川中合而東北流一百八十里
與蘇巴什河會蘇巴什河發源於城西南六百一十里之蘇巴
什高原湖灘中湧泉沸騰會而東流四十里至哈拉庫爾南岸
冰嶺下有巨浸一名哈拉可爾一名伯色克庫爾相連海子三
周環二百餘里其水澄清甘美蓋卽北史所稱波知國之三龍

池也自南而北入焉又東流五十里與坎什拜河會又東北流經布倫可爾之北七十里至塔爾布希與木吉河會木吉河發源於城西六百三十餘里之黑牙克巴什泉流數道從山峽中出東流四十里折而南流經木吉六十里至察哈爾良河南一湖名恰恰夜黑可爾周環百餘里泥淖不可近卽西域志之哈拉庫勒泊也又東流五十里其水入焉折而東南流三十餘里與坎什拜河會又東流八十里至大格斯以上皆由平川或卽大唐西域記所謂波密羅川也按西域志謂停瀦成澤周百餘里者卽鄉土志之哈拉可爾三海子三海子卽三龍池哈喇庫勒泊乃大龍池一在葱嶺之巔一在葱嶺之東畔若秦越後人每將三龍池誤爲大龍池而鄉土志直謂恰恰夜黑可爾卽哈喇庫勒泊其誤尤甚焉北河北源舊在疏附西南境後自窩僕塔哈即烏衣塔哈以西劃歸蒲犁北境新疆圖說蒲犁新圖均以五海子近處爲雅瑪雅爾河源不及喀喇租庫約短縮三百里矣蒲

犂新圖西來二源一出黑牙克巴什卡東西流卽喀喇租庫之

下游又東哈拉札克河東北流來滙卽支子里即克之下游西

域圖志謂迤北兩源合流南注者此也又東流經木吉卡北又

東流經霍什干大克湖北又東流布爾庫倫水納四源自南來

滙一爲木吉水在布倫庫爾湖南一爲哈拉蘇水有小海子在

其東一爲蘇巴什卡水又一水在白西庫湖

一作伯色克庫爾湖

哈拉庫湖東

北四源均與各海子通流同入於布倫庫爾又東北流經上改

子下改子東又東北流經烏衣塔哈山口東出蒲犂境喀什道

分至道里部位圖黑雅克巴什一源卽喀喇租庫北山北麓發

源北流折而東流復東南流至木吉卡出山峽喀喇租庫一流

自西滙又一水傍阿里木圖北山東麓納三小水合而西北流

來入之二源既滙東南流至阿里木圖山東麓蘇巴什一源發

木子濶羅賽里克塔什之東傍蘇巴什山南麓東北流貫哈拉

庫湖又納白西庫湖布倫庫爾湖霍什干大克湖諸水入於河

布倫庫爾湖西北又有一水三源發阿哈比爾卻和大東東北流入於蘇巴什水正河又東北流至上改子東北爲雅瑪雅爾河又東北流至塔什米利東北分爲二支一支東北流至塔司渾台東止一支東南流至雅卜蘇東止均伏於沙磧論雅瑪雅爾河自應以喀喇租庫爲初源大勢均自西之東而蒲犂新圖出源後竟作北流而微偏於東其東流來入者惟哈扎克河與黑牙克巴什卡外一源水道記謂圖巴里克河在烏魯噶喇嶺南今在其東南矣若將新圖偏北流者易而東流則自西庫湖哈拉庫湖均在蘇巴什一源之南與新疆圖說便合蓋蒲犂北境與疏附之瑪爾塔蘇河爲鄰其地均西北高東南下攷之各國雅瑪雅爾自出源後均作東流新圖過偏於北不能無誤也布倫庫爾湖有謂卽布隆庫勒者非也西域圖志布隆庫勒在阿喇楚勒西四百餘里周圍五十里自拔克山北流至此匯成巨澤居山谷間西距葉什勒庫勒淖爾卽伊西洱庫爾四十里

西隔葱嶺相去六七百里安能混而爲一勘界公牘由孔帖格買斯向西行計程八十里坦道至木吉平川草盛水有五一由喀喇租庫達坂東北流之水一由克則吉業克東轉北流之水一由波羅布拉可之水一由倭依巴勒孔西北流之水一由黑雅巴什西南山東北流之水悉滙於此出雅瑪雅河新圖孔帖克買斯在五海子西北在木吉北微偏東公牘謂由孔帖克買斯西行八十里至木吉則是孔帖克買斯在木吉正東可知新圖將北河北源誤東流爲北流此亦一確證也公牘於木吉黑一帶之水條分爲五足補新舊圖說所未備所謂由雅克巴什西南山東北流一水卽哈拉扎克河也

又東南流布倫可爾水西北流來注之又東爲格斯雅瑪雅爾河

一併
附本

疏附鄉土志布倫可爾在坎什拜河之南長十餘里寬廿餘里其水東北流百餘里至格斯入於河至此名格斯雅瑪雅爾河

新疆圖說雅瑪雅爾河在疏勒城南七十里源出喀什噶爾西
南奈曼布魯特部落黑雅克巴什外卡山峽中東流九十里至
我何爾魯折而南流一百里至木吉又西南流六十里至察哈
爾良折而東流一百里至察爾布希又東流一百二十里至格
斯亦名改子外卡水源至此名格斯雅爾雅按蒲犂新圖以四
源合而北流者爲布倫庫爾無所爲另一水自東北來也
又東倭儀水自西來注之又東爲塔什雅瑪雅爾河一作塔瑪雅爾河又東爲
帕水自北來注之爲泰里布楚克河

疏附縣圖倭儀水有二源一出阿吐阿依拉克莊南循烏魯瓦
特南麓東流一出別里阿利莊北東流至雅拉古孜阿莊東二
水合流又東有阿那桿達塔水自西南來入之又東逕阿那桿
阿格孜卡倫北倭儀塔哈山南又東流循浮依木山北麓逕科
羅桿莊南又東爲倭儀水入於雅瑪雅爾河鄉土志倭儀水發
源於城西南四百九十里奈曼部落之別里阿利及阿吐阿依

拉克兩處山峽中均東流八十里至雅拉古孜阿克會而爲一
北流一百四十里至倭僕塔哈阿格孜入於雅瑪雅爾河新疆
圖說格斯雅爾雅折而北流一百十里至威僕塔哈山又北流
六十里至伊勒古楚內卡倫經塔什密里克莊北至此名塔雅
瑪雅河疏附鄉土志格斯雅瑪雅河又東流四十里至下格斯
一名折折而北流七十里至倭僕塔哈出山峽倭僕水自西而東
入焉名塔什雅瑪雅爾河又北流六十里至伊爾古楚卡烏帕
水自北而南流九十里入焉折而東流名泰里布楚克河經塔
什密里克莊之北至波羅斯坦水道記雅瑪雅爾又東流有水
自烏帕爾莊西來匯又東爲台里布楚克河按新疆圖說於格
斯雅瑪雅爾以上未載布倫水於塔什雅瑪雅爾河以上未載
倭僕水於塔什雅瑪雅爾河以下未載烏帕水僅據鄉土志補
入疏附縣新疆亦有此三水其方向流域均合至烏帕水既入
之後又東流是爲泰里布楚克河鄉土志更詳於新疆圖說也

又東分兩支北支爲罕愛里克河南支爲喀拉蘇河均伏於沙磧
新疆圖說泰里布楚克河分作兩支其北一支爲罕愛里克河
東流百二十里經塔斯渾莊又東流三十里至罕愛里克又東
流三十里經岳普爾湖莊又東流九十里出科拉卡外伏於屈
谷恰哈戈壁亦名伯斯罕沙磧其南一支爲喀拉蘇河東南流
一百二十里至雅卜藏驛又東流三百一十里經罕愛里克莊
岳普爾湖莊之南界英吉沙爾之北界至瑪喇巴什廳之鐵里
木華喀拉蘇河在英吉沙爾廳城北四十里其流從疏附縣境
雅瑪雅河分支圖木舒克河至喀喇雅亦與喀喇蘇河會大莊
又東流一百里伏於沙磧按皇輿西域圖志雅璊雅爾東北流
經喀什噶爾城南赫色勒特爾黑楚克二水合流北來會之名
喀什噶爾達里雅又云喀什噶爾達里雅卽雅璊雅爾之下流
西北會赫色勒特爾黑楚克兩河之水水道記亦云烏蘭烏蘇
雅璊雅爾過喀什噶爾城南而合今新疆圖說謂雅瑪雅爾分

爲二支北支東流二百七十里南支東流五百三十里均伏於沙磧鄉土志謂坎什拜一源最大惜冬日凍而不流惟黑牙克巴什泉水清而流急夏漲不可涉分支後均伏於沙磧與喀什道分至道里部位圖合是雅瑪雅爾下流不能入烏蘭烏蘇甚明然雅瑪雅爾河得龍池真源容納衆流洋洋千餘里雖未能達於北河北源亦西域一大川也昔人論黃河以大積石爲重源以葱嶺北河南河爲初源北河之源遠於南河北河三源一爲赫色勒一爲瑪爾堪蘇而雅瑪雅爾與喀喇庫勒僅隔一嶺自應仍列爲北河一源至河流變遷支渠日多水力耗散今已不能與北源相會亦詳著之以存其真況地球諸水爲太陽熱力所吸皆日見枯竭固不僅雅瑪雅爾一河也

新疆圖志卷六十九

水道三

葉爾羌河

葉爾羌河二源一爲澤普勒善河一爲聽雜阿布河匯爲葉爾羌河是曰葱嶺南河

水經注河水自葱嶺分源東逕迦舍羅國城南有水東北流水羅浙西山山卽葱嶺也逕歧沙谷出谷分爲二水一水東流逕無雷國北又東流逕依耐國北去無雷五百四十里又東逕蒲犂國北又東逕皮山國北又東與于闐河合皇輿西域圖志葉爾羌謬斯騰在葉爾羌城北五十里源出西南葱嶺中屈曲出山東北流分爲二道過城南名哈喇烏蘇又東行復合爲一南會聽雜阿布謬斯騰東北行六百餘里入塔里木額爾勾郭勒東注羅布淖爾按葉爾羌河爲葱嶺南河發源既遠且支水亦百派紛注南疆各河流域之廣無廣於南河者新舊各圖亦繁

簡不一而以前莎車知州海英喇斯庫穆等處形勢圖爲善據
海岡卡拉胡魯木達坂北八浪河東有一水向北流經克紫塔
哈東西北流經明立克卡西有一水發源素蓋提達坂經吉不
拉南流來匯旣匯折而西流經阿哈塔北哈帕龍東南有二水
合而北流來注之是爲玉河卽南河南源也發源於東初向西
流漸西北流至喇斯庫穆西折而北流至托克札提達坂北始
折而東北流爲澤普勒善河水經注所謂東流經無雷國北依
耐國北蒲犂國北皮山國北者乃新疆圖說出烏魯克瓦提達
坂北流一源正在今蒲犂廳城西北乃澤普勒善河正西之源
去卡拉胡魯木達坂一源約七八里其托布隆河上游渾居拉
普河又東南穆斯塔格河福新河均爲水經注所不及李源炳
勘界公牘由素蓋提向南行進山口八十里過達坂五十里至
奇轉里又五十里至明立克卡六十里至達爾烏孜又五十里
至黑子塔哈轉向西南行四十里至八浪河又五十里至卡拉

胡魯木達坂洪圖作喀喇潤魯木嶺通提拜特西南流之水卽澤普勒善河源西域圖志水道考但知葉爾羌河南源爲哈喇烏蘇與聽雜阿布河會尙無澤普勒善河之名至水道記始言南源爲澤普勒善與北源聽雜阿布河匯新疆識畧亦從之均謂源出喀楚特山其卡拉胡魯木達坂一源從無人問津矣河出崑崙之說始於爾雅山海經漢以來諸子皆宗之然歷二千餘年而不得其實光緒初收復新疆改建行省適有英俄勘界之役凡雪山冰嶺開闢以來馬跡所不至展齒所不經者一再委員親歷於是南北河之源條分縷晰瞭然可睹卡拉胡魯木達坂素蓋提達坂西連葱嶺實崑崙主峯也西域傳水經葱嶺一源皆指南河亦以源出崑崙而特著之水經注引康泰扶南傳恒水之源出崑崙山中有五大源諸水分流皆由五大源則南河必占一源可知昔人記山水道里皆就身所親歷者言之法顯記北河之大龍池卽今哈喇庫勒泊記南河之蒲犂卽今

色勒庫爾途之所經也若卡拉胡魯木素蓋提兩達坂皆荒僻險遠非勘界前往又孰得而知之

澤普勒善河有三源一源出蒲犁西北烏魯克瓦提達坂入於賽里河

莎車舊圖烏魯克瓦提達坂北麓有二源一源經伯加什卡

卡什北一源經愛加克卡

一作阿拉克卡

西北至屈滿西北合而東南流又

經梯子拉伏

一作拉子拉

北又東南流入於賽里河此卽新疆圖說出

烏魯克瓦提一源也圖說一源出色勒庫爾城西烏魯克瓦提

達坂北流六十里至阿拉克外卡折而東流六十里至屈滿有

拜加克水自南入之又流五十里與澤普勒善河會按此源新

疆圖說及海圖莎車府圖皆有之而蒲犁廳新圖獨無此水烏

魯克瓦提達坂卽山脈圖之烏魯阿喇特達巴在和什庫珠克

嶺東北爲葱嶺東北分支處應在喀什噶爾西南蒲犁西北西

域圖志謂在喀什西北誤鄉土志亦不載此山但云城西六十

里達申干卡層嵐疊峯土人稱爲西山卽往俄國要路烏魯克
瓦提大約西山之北麓也水經注以葱嶺河過蒲犁依耐皮山
各國北爲南河正源喀什道分至道里部位國蒲犁西北有一
源出賽里克塔什東南麓東南流經伊里克雅克喀喇蘇之間
至黑子里克節克卡北又東南流有一源發自喀因曼爾東麓
東流來匯又東南流至喀哈爾滿東有一水自克克馬馬西流
來入之又東南流至屈滿西入於賽里河考其流域尙在色勒
庫爾城西一源之西北其經屈滿西則同賽里克塔什之源必
更遠於烏魯克瓦提也與水經注合仍列爲澤普勒善西源新
疆識畧謂古今水道或有移徙葉爾羌河源昔經蒲犁國北今
經其南證以今圖實未移蒲犁南也勘界公牘由它司漫向北
行一百四十里至和加克巴依卡即額勒克巴依卡此處係塔墩巴什紅孜
納普爾勒格蘇三道總要之地塔墩巴什一帶之水與紅孜納
普之水由此合流繞塔什霍爾罕之北四十里會塔哈爾滿水

東行二百餘里入澤普勒善河按紅孜納普近塔什霍爾罕爲廳城附郭村莊卽渾吉拉堡爾勒格蘇卽伊里蘇塔哈爾滿在屈滿之北殆謂城南之水繞城北入於塔哈爾滿而後東行也塔哈爾滿在納加什卡東北皆山峽低窪處與烏魯克瓦提一源相近皆南河初源也一源出蒲犁西南穆斯塔格山東北流爲賽里河烏魯克瓦提達坂一源來滙折而東流爲托里布隆河會於澤普勒善河

蒲犁鄉土志云賽里河源出於城南三百里之穆斯塔格山此山體勢綿長自西而東葉城皮山蒲犁南境皆可謂之穆斯塔格也帕米爾形勢圖賽里河二源一發倭海及苾達坂東北巴格志海子東北流經霍什別里又東流經托阿克玉迭克至塔墩巴什卡西南一源發明鐵蓋達坂東北西北流經喀什各醋西至塔墩巴什卡西南二源匯而東北流海圖托布隆河發源渾居拉普達坂東北出山東北流納南來一源滙爲渾居拉普

河又北流經伊里蘇山口之西又北流經額加克巴依一作加克巴依一作阿加克

卡西爲托布隆河卽喀楚特山一作托布隆一源也新疆圖說一源出喀

楚特山水從山峽內出北流一百里至阿加克巴依又流一百

里至金里克又喀楚特河自西南入之又流六十里至胡子功

卡又流五十里至色勒庫爾城北有新安卡水自西南來入之

折而東流八十里至咸底亦名新底莊又流六十里至阿克乞

又流一百三十里至空巴爾折而北流七十里至科世東復東

流七十里至和什普拉卡倫北水源至此名澤普勒善河亦名

玉河天山南路葉爾羌國喀爾楚在塞爾勒克一作葉爾羌西南與拔

達克山連界卽喀楚特也蒲犁新圖賽里河源在城西南初發

二源一源西北流在克里克西北克里克在明鐵蓋達坂西南

一源在安迭敏東東北流經瓦罕吉爾之北二源合而東北流

經可可土魯克西西來一水發薩雷淵勒一作薩雷東南麓山峽中

東流經堆吉鹿滿蘇卡南又東流經不伊克卡東南入於河又

有一水發源明鐵蓋山西北西北流經明鐵蓋卡西南又西北流入於河又東北流經平川塔克墩巴什東北有麻札水自東南來入之麻札水發源明鐵蓋東麓山峽中二源合而西流經渾吉拉堡東麻札西又經愛加克巴依一作阿加克一作加克又東北流入於河又東北流有一水源發屯庫里克山南山峽中東南流經阿木他木必司坦卡南入於河又東北流折而北流有一水發源烏的浪東它司漫北伊里蘇西南共四源合而西北流經暫坎溝額瓦巴什西入於河又北流經庫子渾即新羅圖說胡子乃東磔不得爾西又北流經蒲犁廳城東又東北流經托古浪峽西又東北流經屈滿山口有一水發源哈拉庫湖東南烏魯郭勒巴特山西南山峽中四五源合而南流經科克馬克西納東西二小水又南流經艾南湖東申底譯西來入之卽羌渾水也水道記西源折而東南流有水經羌渾山東來入之新疆識畧一源出喀楚特西大山東流一百六十里有一水出齊齊克里克嶺流一百二

十里經色勒庫爾東南合流出源後第一支水二說略同應卽此水也賽里河上承烏魯瓦克提達坂一源折而東流經申底西又折而東南流班第水自南來入之又東南流有一水發源奇恰克驛南三源合而南流經卜爾金西又西南流入於河奇恰克卽特拉克也新疆識畧又一水自特拉克嶺南流一百里來曾是爲托克布隆河又東流經烏溪北又東流經牙滿達坂北是爲托里布隆河水道記西源又東逕托里布隆之南曰托里布隆河新圖作托魯布倫適當其南勘界公牘至奇恰克卡向東行二十里轉向北行四十餘里至白芍瓦特亦名托里布倫又東流經阿密里克東北有一水二源合而東北流經大同西亦作大同小同北入於河又東流排斯拉巴特河東南流來入之又東庫唐克河東北流來入之又東右與喇斯庫穆河會蒲犁新圖托里布隆河又東流至科素拉普即新疆圖說之科素拉普西有湯吉塔爾河自北而東來入之湯吉塔爾河發源熱水溝東北鐵里牙達坂西

南流經托魯布倫驛西南又一水合而南流經熱水溝順山峽
漸東南流經克其克玉子達坂西南塔爾北又東南流入於河
即海圖之鐵爾雅提達坂東南一源新疆圖說之鐵里達坂排
斯拉巴特河也圖說一源出英吉沙爾布魯特坎科部落鐵列
達坂卽特拉克嶺爲排斯拉巴特河東南流一百三十里至鐵
里達坂西入莎車境距城西百五十里復曲折東行百四十里
至科世東北與澤普勒善河會圖說以此河爲澤普勒善河四
源之一以各圖考之三大源均在西南其流甚長且納無數支
水始成一源排斯拉巴特河圖說謂長二百七十五里而蒲犁
新圖發源鐵里牙達坂西南流折而東南流不過百餘里與他
支河無異不足爲一源也謹降爲支河賽里河又東流庫唐克
河發源大同小同東東北流入於河又東流喇斯庫穆河自南
來入之卽玉河之下游也自蒲犁東南隅入境西北流納八九
支水至喇斯坎西北漸東北流經布倫木河北東流又東南流

經小同西南又折而東北流入於河此蒲犂新圖賽里河形勢也勘界公牘由和加克巴依卡向北行一百九十里至色勒庫爾城詢諸土人云南自紅攸納普西南自塔墩巴什北自塔哈爾滿山東之麻里陽固莊一帶總名曰賽里河惟海圖以托布隆河初源爲渾居拉普河卽賽里河之初源蒲犂新圖不能指定賽里河發源何山而其二源一在明鐵蓋達坂西北一在克里克西北與帕米爾形勢圖及海圖均合鄉土志始言賽里河發源穆斯塔格山蓋明鐵蓋克里克倭海及蕊各達坂皆穆斯塔格之枝幹也新圖發源之後先東北流而後東流流曲而支水多海圖則直向北流支水亦少曲而多自必詳於直而少也賽里河形勢自以新圖爲得其真

熱水溝河 自熱水溝南流者爲湯克塔爾河東流之水經天罡塔爾東北有托魯布倫驛水二源合而西北流來入之又東流經鐵里牙達坂西南麓至七里拱拜驛西南折而南流經塔

希代克驛東恰爾倫東又南流有恰爾倫水二源合而東北流
來入之又南流經八海驛西有一水自東南來入之又南流有
一水自南來入之又折而東北流有一水二源合而西北流來
入之又東北流經開子驛南又東北流逼近哈拉達坂黑子達
坂色克里克達坂南麓山峽中納南北四小水合而東北流至
托乎拉克驛南戈壁伏於沙按蒲犂廳境支水叢雜盡入南北
二河而熱水溝東流之水實另爲一河不入賽里河各國因與
湯克塔爾河源往往誤作一河指東流爲西流以至源流倒置
不可不辨蒲犂改建廳城所設驛站均傍此河而行至托乎拉
克驛河盡驛亦止焉謹列入蒲犂支水

以上蒲犂支水

一源出卡拉胡魯木達坂素蓋提達坂合而西流是爲玉河卽葉
爾羌河又西北流福新河匯穆斯塔格河來注之又北流入於澤
普勒善河

卡拉胡魯達坂素蓋提達坂南北相直在今皮山正南和闐西南卡拉胡魯木水出源西北流素蓋提水出源南流來滙此新疆圖說阿哈塔什一源之上游也英人楊哈思班游記以烏帕朗南一河爲眞葉河此乃初源又名玉河中國產玉之地甚多惟昆侖產美玉書曰火炎昆岡玉石俱焚可見玉出昆岡三代已然至河下流經密爾岱山之西乾隆間進玉持磬料皆採之密爾岱故謂之玉河見水道記玉河西流經哈帕龍南又西經黑黑子江干南又西至英艾達坂東南麓庫南洛提東南有一水發源巴拉提塔拉西北二小水合而東北流入於玉河又西經奇拉克沙達坂南麓至河沿之南又西經而代克沙特北至八札達坂卡南有一水發源達坂北東南來入之又西經奇靈烏魯達坂東又繞其南麓有一水發源蘇格穆準噶爾南東流納西北來一小水又東經喀魯爾南折而東北流納東南來一小水北流入於河又經奇靈烏魯達坂之西西北流經塔什摩

摩南又經阿押可布黑勒克西南又經克英勒克西南又經阿子卡西南又經確可塔什東北又經土帕達坂宗章戛爾西南福新河匯穆斯塔格河自西南來匯福新河發源阿奇爾山東南在卡拉胡魯木達坂西百數十里有二源一南一北南者源較長合流爲福新河西北流經阿格里達坂西南又東北流穆斯塔格河自東南來匯沿穆斯塔格河兩岸向南行可通巴拉提既匯又西北流經阿不拉罕阿的古里西南又經及罕勒克西北有一水發源星峽達坂東北麓東流又一水自東南來匯東北流入於福新河勘界公牘星峽阿格觜向南行五十里至星峽可倫坎巨提尾卡越卡牆轉向西南行約六七十里至星峽達坂通坎巨提後部達坂東流轉向北流之水與阿格里西北流水會於星峽阿格觜入澤普勒善河公牘謂星峽達坂水會流入澤普勒善河者卽玉河也澤普勒善河尙在下游又西北流經大五子西漸北流偏東入於玉河福新河在穆斯塔格

河北即烏帕朗河也西域回部圖將烏帕朗另爲一河入於賽里河誤甚英人楊哈思班游記阿奇爾與穆斯塔格兩山間其川爲烏帕朗將過阿奇山探烏帕朗川乃由南路行阿奇爾僅一山口在山口望烏帕朗左右峯尖如鍼積雪不化踰嶺進探其源知亦流水所成又自阿奇爾行順烏河而下至蘇格穆準噶爾溯攷河源知從穆斯塔格流水來又云至蘇格穆擬住烏帕朗與葉爾羌河合流處行三日見一河從土穆沙格山口來入烏帕朗沿河有路踰此山口可至乾竺特又三日見一河當是葉爾羌而水少於烏帕朗色青且清鄉導云此眞葉河此處亦名喇斯庫穆河兩河合流處地名宗章曼爾宗大也章夏爾草地也此處上溯葉河源百八十里中國四百五十里溯烏河源百五十里

朗卽福新河入於喇斯庫穆俄人康氏游記此兩月間所勘喇斯庫穆河凡八百三十英里河邊不乏可耕之土樹林蕃茂廢

村落廢水池廢溝渠隨處皆是每一山礪必有舊堡五六十年
前爲乾竺特所擾故成荒墟喇斯庫穆匯福新河後經宗章夏
爾西有一水經玉溜克南東流來入之又東北流經土帕達坂
西有伊里蘇水東南流來入之伊里蘇水發源伊里蘇山東南
流經伊里蘇南入於河俄人康穆才甫斯基游記出伊里蘇山
口時遇一溫泉可以浴身又經土帕達坂西北折而西北流又
折而北流至托克拉提達坂北入於澤普勒善河玉河經土帕
達坂後折而西北流又折而東流又折而北流有一水經布洛
沙莊南東流來入之又北有一水經小回莊南東流來入之又
北有一水發源押慢塔思達坂經回莊南東流來入之又北
流經阿普塔拉里克達坂之西又西北流至托克拉提達坂之
北入於澤普勒善河新疆圖說謂澤普勒善河有四源一源出
阿塔什大山峽中曲折向西北流二百七十里有雀普一作雀水自
東入之又流三十里至亮噶爾卡倫南有浮木拉沙水自南入

之有阿甫拉克水自北入之又曲折東流一百三十里至空巴爾與澤普勒善河會按新疆圖說阿塔什一源卽海圖卡拉胡魯木達坂一源之下游謂由發源至空巴爾四百三十里僅及海圖之半所謂雀普浮木拉沙阿甫拉克諸水大約在海圖回莊小回莊兩處作同二水之間不能確指其次第矣莎車州舊圖以卡拉胡魯木達坂認爲聽雜阿布河初源而以澤普勒善河東南源屬之阿什大山其誤與新疆圖說同應依海圖更正

卡拉胡魯木一源既會澤普勒善河折而東北流和塔什拉普水來注之又東北流奇盤水來注之

澤普勒善河又東流經干申提達坂東南和什拉普卡水合英格子咬里克水東北流來入之新疆圖說和什拉普卡河在莎車城西南一百六十里源出密爾岱山西北流五十里有依格愛勒即英格子卡水自西入之又曲折北流七十里至托古沙卡折而東北流九十里至本卡東與澤普勒善河會又東流經奇盤

山北奇盤水北流來入之新疆圖說奇盤水亦名達燕水莎車城西南二百四十里其源出葉城屬密爾岱山東流一百里至奇盤莊折而北流五十里至一泥西入境又流六十里至慶木都與澤普勒善河會與海圖均合水道記托里布隆河又折而東北流逕英額齊盤山北爲澤普勒善河又東北流百數十里逕和什阿喇布莊回語和什雙歧之謂阿喇布帕爾西語水也莊在葉爾羌西南二百六十里是爲採玉第六營和什阿喇布卽和什拉普也

又東北流過莎車城南爲葉爾羌河又東北流入於巴楚州境聽雜阿布河一源來會

莎車府卽葉爾羌回語謂地曰葉爾謂寬廣曰羌元時爲鴉爾看押爾牽明時爲葉爾欽爲葉爾奇木皆葉爾羌之轉音見水道記奇盤水旣入之後又東北流經阿哈塔莊西北又經一肯蘇莊東北河兩岸皆平原又東北流經伏魯克莊東南波斯坎

莊西北爲莎車府城東南路渡口河之東岸上英額斯塘莊東南有草湖曰洗泊卽將軍兆惠黑水破賊之地水清而黑又東北流經愛吉特虎驛東南下英額斯塘莊西北又經巴楚州麥蓋提渠首折而北流出莎車府境莎車州舊圖澤普勒善河至熱瓦奇莊東南分一支北流經卡木拉莊西罕阿里克西北米霞爾莊北塔哈爾莊東至愛吉特虎驛南止乃窩蒲渠非分支也西域圖志葉爾羌謬斯騰在葉爾羌城北五十里源出西南葱嶺中屈曲出山東北流分爲二道過葉爾羌城南名哈喇烏蘇又東行復合爲一南合聽雜布謬斯騰又哈喇烏蘇舊音喀喇烏蘇源出葉爾羌城西葱嶺中東流逕城東乾隆二十三年十月將軍兆惠攻葉爾羌城未下從城東率師渡哈喇烏蘇進兵城南西域圖志謂過葉爾羌城北旣誤以窩蒲渠爲分支謂過城南名哈喇烏蘇源出葱嶺東流是葉河之外又有一河殆不知哈喇烏蘇爲洗泊海子也南河正流行葉爾羌城南爲葉

爾羌河並非分爲二道哈喇烏蘇在葉爾羌河南亦非源出葱

嶺水道記澤普勒善河經採玉第六營營在兩岸又東北流四十里

逕喀崇莊南是爲第五營又東北流六十里逕阿爾瑪斯莊南

有密爾岱泉水自南來會是爲第四營二營在兩岸又東北流五十里

逕塔爾哈奇莊北是爲第三營又東北流三十里逕烏魯克明

莊北是爲第二營又東北流三十里逕烏魯克圖必莊北是爲

第一營三營在兩岸又東北七十里逕葉爾羌城南河水屆秋澄清見

底又東北停爲洗泊在葉爾羌城南七十里水草之交盧奴所瀦是爲黑水回

人稱曰喀喇烏蘇兆惠被圍賊決喀喇烏蘇灌營有濇得洩傍

水有林木賊施銃銃着木我師取其鉛丸以濟軍往尋遺蹤玉

河清泚岸沙如銀隨波游魚沿溪豐草渡河而南四月沙聚作

花香中行二十里至洗泊旁建顯佑寺北爲后土祠祠中一枯

樹合十數人抱卽曾受鉛丸者河水又東北流至揚瓦里克莊

逕龍神祠南在道爾巴城東南五十里祠爲乾隆四十二年建又東北流一百數

十里至莫克里特莊亦曰邁格特莊西

在葉城東二百里

與東源會是將

軍兆惠戰績均在洗泊洗泊卽哈喇烏蘇尙在玉河南二十里非葉河明矣南河二源在葉城境內均東北流而瑪喇巴什舊岡入境後均作北流殆爲新疆圖說所誤巴楚州圖說已作東流新疆新圖二源並東流聽雜布河尾支渠無數至麥蓋提渠而止並不與澤普勒善會蓋聽雜布河支渠太多水力耗散故不能與西源會然以地勢度之巴楚南境南北河且處處相通而南河二源流域逼近反邈若秦越有是理乎

一源出英艾達坂爲聽雜布河

一作聽雜布河

西北流折而東北流過葉城

縣入莎車府境又東南流入巴楚州境爲資拉甫河左與澤普勒善河會

英艾達坂在卡拉胡魯木達坂西北玉河之南阿爾奇山北麓也西爲奇拉克沙特達坂又西爲奇靈烏借達坂東爲庫卡提達坂又東爲素蓋提達坂唐書于闐西五十里有葦關又西經

勃海西北渡繁館河水道記以爲卽聽雜布河以今圖證之和
聞西北過庫庫雅水卽聽雜布河應不謬也皇輿西域圖志聽
雜阿布謬斯騰在葉爾羌城東南五十里源出庫克雅爾塔克
北流出山經沙圖伯什阿里克托古斯恰特北會哈喇烏蘇入
葉爾羌謬斯騰水道記南河東源曰聽雜阿布河出庫克雅爾
山在和闐西與其南山屬水自山出北流有一水自西來匯又
北流二百餘里至沙圖城北分爲二行百八十里復合東行百
里爲聽雜布河亦曰哈喇斯坦河又東北流逕裕勒阿里克卡
倫東又東北流逕哈爾噶里克莊南爲哈爾噶里河又東北爲
沁達勒河卽乾隆中副將軍富德扼賊之地又東北至英克里
莊會西源新疆圖說聽雜布河在葉城西八十八里源出卡拉
胡魯木達坂北流一百里至明立克下曲折流一百二十里至
奇拉克沙的折而西流一百里至卜合洛的從此水分兩支一
支西北流一百二十里至阿哈塔什北又流一百三十里入莎

車屬色勒庫爾城境一支北流六十里至庫南洛可一百三十里至玉隆村折而東北流一百二十里至廓嘎斯又曲折東北流二百里至一肯蘇又曲折東流五十餘里至孔額達莊爲喀喇烏蘇河又曲流二百餘里至買口雜可入瑪喇巴什境經子里北及和闐河阿克蘇河會海岡聽雜拉布河二源一源出英艾達坂北亦有二源一出達坂東北一出達坂西之奇拉克沙達坂東北卽水道記所謂一水自西來匯者合而西北流經黑黑子戈東又經吐西哈達什西又西北流至庫底麻札西南折而東流至他塔孜東南一源出英艾達坂北西北流來匯旣匯北流經哈拉斯坦西又經阿哈胡魯木達坂西漸北流又東北流經葉城西北庫庫雅水玉拉里克水烏沙巴什水三水合而北流入於河光緒三十三年夏葉城縣圖將聽雜布河作提滋拉普河入境自庫提麻扎卡起初西北流繼東北流至梧桐蘇布隆玉隆南西流又曲向東流復折而北流三十四年冬圖於

山峽高低道里險易皆經測量河兩岸村莊有東西易置者已多更正發源英艾達坂南初北流經扶浪西北東北流又西北流經條立而拱古立奇卡庫底麻札卡東北又經阿哈木吉的西流怕霍普水布隆水玉隆水合而東北流來入之又西流經穆蒙克東南分渠北流廢厦斯廓厦斯二水合而東北流來入之正河漸北流經烏素侶紱西南分渠東北流又經西霍普西漸東北流又經阿道拜可西分渠東流又分渠北流又經沙雅提西北分渠東北流又經托和雅西南分渠東北流又經伯什伯克什哈拉巴哈西東北流爲坎濟大橋過橋漸東流經蘇塘艾治克北漸東北流至哈拉其杆東分一渠至哈拉蘇東向東分一渠至伯什坎莊東向東分一渠又東北流至上密西西東北分一渠正河漸北流至紅湖沙西北入莎車府境漸東北流經通古自六克莊哈喇葉口村西北又經塔斯哈馬莊西入巴楚州境東流爲資拉甫河又東流玉惠渠上達澤普勒善河東

南流來匯卽二河通流處也又東流南北兩岸共開十三渠至麥蓋提西折而東南流東岸又開九渠至下米喜止焉三十三年夏葉城圖庫提麻札卡東南有草湖一夾湖二水均西北流至宗農南合復分二支西支沿達坂西出戈壁經斜格巴可西北哈喇玉爾滾東南東北流至察任木可西南分爲數渠止東支沿達坂東行至岱布代爾南又分爲二經阿瓦提東北復合至賽提土營東北止岱布代爾東又分一支經條碗阿浪西北復分二支一至洛河西止一至巴稔東北止草湖東北羣山叢雜山北麓有泉東北流經大戈壁西北流至艾肯樞杆止葉城東皮山界衆山之南有一泉北流經皮山波肉莊西復入葉城界又北流分爲三四支至哈拉巴斯漫東北止三十四年冬圖一水出卡克里山北麓西北流至牙哇什南分爲二支西支經岳梧蘇卡什怕洗之西北流東支經托可漫里康沙爾東西北流至宗農東南合而北流經布古孤松溝巴什阿浪哈拉巴克

西至賽克斯倭東北官道南止庫庫雅梧桐蘇之間有一泉東北流又北流至察什米西提東官道止二圖互易未知孰是按聽雜布河實發源英艾達坂卽英額齊盤塔克水道記謂出庫克雅爾山尙在英額齊盤東南其說本之西域圖志或謂卽庫南洛可西域圖志作三源一源出英額齊盤塔克北一源出庫克雅爾塔克北源一出裕勒阿里克塔克北以今圖考之英額奇盤在北庫克雅爾在南相去數百里新疆圖說謂出卡拉胡魯木達坂誤認葉河之源爲源故至下合洛的以下直謂分爲兩支所謂一支西北流者卽澤普勒善河也是將東西二源混而爲一沙車舊圖竟謂聽雜布河至葉城北爲喀喇烏蘇其誤尤甚葉城舊圖葉城西南尙有四水爲新圖所無一曰庫庫爾水新疆圖說在城西南一百九十里源出瑪爾胡魯克山東北流一百六十里至庫庫雅卡東折而東北流八十里至伯什鐵列克達坂北又曲流六十里有烏沙巴什河自南來入之又北

流四十里至哈里克莊又流五十里與喀喇烏蘇會一曰玉
拉里克水新疆圖說在城南一百八十里源出八沙拉達坂北
流一百八十里至玉拉里克卡又北流八十里至伯什鐵列克
達坂與庫庫雅水會一曰波內水新疆圖說在城南七十里源
出宗農莊東泉穴北流九十里至城東分蔭山莊地畝以上四
水見之新疆圖說葉城莎車舊圖源流備載而葉城新圖僅庫
庫雅宗農莊二水見之圖中並不詳其源流亦稍疎矣仍遵新
疆圖說備著於篇

披雅滿水 新疆圖說披雅滿水在葉城東四百六十五里其
源出杜哇山北流一百里至杜哇莊有阿拉塔什水自南入之
又北流一百里至帕爾慢分蔭地畝

裝桂雅水 新疆圖說裝桂雅水在葉城東南三百七十六里
其源出南山泉穴北流一百里分蔭地畝

桑株水 新疆圖說桑株水在葉城東南三百五十里其源出

桑株達坂東北流二百五十餘里至桑株卡倫北折而東北流一百餘里至木吉分蔭小莊地畝

達斯滾水 新疆圖說達斯滾水在葉城東南二百五十里其源出入沙拉克達坂東流二百里至阿克小折而北流一百里至克里陽卡倫北六十里至合什塔有弼拉水自南入之從此水分兩支一支東北流七十餘里至咽莊瑪分蔭小莊地畝一支西北流五十餘里至綽洛克驛伏於戈壁

以上葉城小水

碧羅布河既會澤普勒善河又東流過巴楚州城南又東至噶巴克阿克集與北河會

水道記葱嶺南河自始會折而西北行至愛濟特呼軍台東北

六十里

合什塔有弼拉水自南入之從此水分兩支

又折而東北流六十里逕賴里克軍台南又東

北九十里逕邁那特軍台南又東北百里逕阿朗格爾軍台南又東北八十里逕阿克薩克瑪喇爾軍台南南河自台南折而

東北七十里巡畢薩克底舊軍台南又東北七十里巡塞爾大

努斯舊軍台南又東北八十里巡哲克得里克托海

同治初年得沙喇也
里克有屯兵處水關

舊軍台南又東北流逕巴爾楚克軍台南台南爲沙山山外

爲河河之南岸卽沙磧南河又東流逕衡阿喇克軍台南軍台

傍烏蘭烏蘇東北南河又東會北河河源紀略云西源與聽雜

阿布河合東北流四百餘里至瑪哈爾塔克境其南爲戈壁又

東行五百里至噶巴克阿克集與喀什噶爾河會新圖說聽

雜阿布河在瑪喇巴什廳城南三百里亦名喀喇烏蘇從買口

雜可入境北流百四十里至土司塔哈鹽山西與澤普勒善河

會又澤普勒善河在城南百十里卽葱嶺南河從亦拉克地方

入境北流百三里至邁那特驛又流九十里至阿郎格爾驛折


而東流百五十里至土司塔哈鹽山北自是以後經大戈壁樹

窩一帶曲折東北流五百餘里至噶巴克阿克集與葱嶺北河

會巴楚州新圖玉河行至牌樓入境玉惠渠首啣玉河東南流

尾注資拉甫河卽聽雜布之末流也玉河入境東流二十四里至賴里克二台又東逕慢那特_舊三台南又東向東北分一支不遠復合又東經阿朗格爾四台南向東分三支一支東流經阿克沙克五台北折而北流至艾克司冬止一支流經五台南折而北流入東西兩海子一支東流經帖哈冬南沙旺里克北又分南北二支同東流北經闕展里克台卡拉而梗南入於鹹海其南支至海南木喬台西南又分南北二支夾瑪喇巴什莊東流至卡拉塔克台西合流又分南北二支同東流北支經阿哈胡米北蘇沙湖有二水南流來注又東南流經克拉甫山南巴爾楚克台東蘇沙湖有二水東南流來注又東北流經庫庫爾台東南南支東流經由百萬拉克孜里庫旦北又東流經阿克沙買提托和拉克子拉提南漸東北流至連皮東北二支合而東北流經洪河拉克台東南又東北流入溫宿縣境又東北流百餘里至噶巴克阿克集與北河會按喀喇烏蘇專以洗泊

得名在東西二源之間舊說屬之聽雜布河誤矣巴噶克阿克集爲南疆四大河交匯之地在巴楚州東境距城五百四十里與和闐屬卻亞可草場連界新疆各國均無其名惟水道記著之圖說可謂詳人所略南北河至巴楚南境衆水停滯湖河交錯處處可通舊圖均詳於川水畧於支水水道記叙南北河下游經過台站如指諸掌以新圖證之若合符節而於南河支流僅記阿克薩克即阿克沙克東一支渠至巴爾楚克台西南止其南河以北諸海子一概不及謹就巴楚新圖續述以補遺焉



新疆圖志卷七十

水道四

阿克蘇河

阿克蘇河源出烏魯山東流入烏什境爲其希布勒孔蓋河

源出烏什極西西北二源一出烏魯達坂阿克克雅二山之間東流一出奇格爾達坂南麓傑地塔什北麓舊卡倫西北東南流匯爲一源正西二源一出烏魯達坂南麓克圖瑪拉克卡倫西北一出阿黑沙依達坂北麓克圖瑪拉克西南東流偏北匯爲一源東流至恰子不拉克卡倫有一源發廓克沙勒嶺東南流來匯東流爲其希布勒孔蓋河又東逕哈喇胡里至阿哈奇格爾共十二莊各開渠引河水北流溉田按新圖謂源出烏什極西東流逕齊恰爾川烏魯兩達坂之間始入烏什界爲正西最初之源較之西域圖志謂托什干達里雅源出烏什西烏成庫什達巴水道記新疆識略謂源發喀克善山尙遠探數百里

也

又東有水自北來注之

源出喀克善山南流逕巴拉良山東麓又經科科爾之西注於
河水道記烏什西北有葱嶺支山曰喀克善山阿克蘇河西支
發焉新疆識畧阿克蘇河出喀克善山是爲畢底爾河按喀克
善山所出實支水非正源也其正源尙在喀克善山西數百里
源發於西向東爲正流喀克善山乃自北而南非正源明矣畢
底爾河之西尙有其希布勒扎蓋河爲前人圖經所未及今據
新疆圖說及新圖補入

又東玉簪水自北來注之

玉簪河有二源一出阿哈奇里西山一出戈什山東麓匯而東
流逕哈什哈什托海之西爲玉簪河新疆圖說玉簪水在烏什
城西二百二十里其源出奇里克布魯特戈什山南流二百里
與畢底爾河會

又東別疊水自北來注之

別疊水二源均出別疊里達坂一逕阿恰奇里東一逕布魯特奇里克部落西合而東南流逕伊布拉什東漸西南流逕哈衣塔東又逕鷹洛山西麓入於河新疆圖說別疊得意水在烏什城西一百三十里其源出城西北內附之奇里克布魯特部落別疊達坂雪峯下東南流四十里至阿哈奇木又東南流八十里至伊布拉引外卡又南流四十里至哈依塔又南流五十里至巴什雅哈瑪莊與畢底爾河會按水道記西支流南百里至額爾濟巴什嶺一水自北來入之同東流經胡什齊布魯特界勘界日記圖別疊里山頂中俄界牌西南麓依布拉卡倫之北山峽中有水南流經倭儀塔

一作哈依塔

之西出別疊里山中東南流均指此水也

又東雅璊素水自東北來注之

新疆圖說雅璊素水在烏什城西六十里其源出雅璊素卡側

地穴中西南流八十里與畢底爾河會勘界日記由烏什向北

行十五里過雅瑪雅河

一作雅瑪

又十五里過哈拉巴克河

一作哈拉

按

此河源出雅滿素卡倫在烏什正北西南流入於畢底爾河沙大臣所過卽雅滿素水之初源也惟畢底爾河分支三四俱繞烏什北面城北第一河爲吉馬水再北爲托什罕河經流張啟字圖出烏什城北行僅有一路喀喇八克莊在托什罕河北岸再北爲馬廠水雅滿蘇卡倫尙在馬廠河北岸何以沙大臣北行不渡吉馬水與托什罕河而先渡雅滿蘇後渡哈拉巴克則是雅滿蘇河又在哈拉巴克南矣似所指喀喇八克河卽托什罕河上游此與新舊各圖歧異之甚者謹著以待考

又東遶畢底爾卡倫爲畢底爾河

畢底爾卡倫在騰洛山西北麓水道記畢底爾卡倫在烏什西九十里

又東沙岡水南流遶胡什山爲胡什奇河自北來注之

沙圖水源出新墾店南小海子逕沙圖卡倫西至胡什塔哈注於河水道記又東有小石山高聳曰胡什山賴黑木圖拉之亂賊據此峯以拒官兵畢爾底河經其北西域釋地胡什奇河自畢底爾卡倫東流分爲二南支經城西又分爲三繞城東北復合爲一與北支合流至察哈拉克出境新疆圖說畢底爾河在城西四十里其源出胡什齊布魯特部落廓曼爾特山南流六十里有鐵列克塔什水自西南入之折而東流八十里至其希布勒孔蓋河有柯卡的水自西北入之又流六十數有而衣勒克水自南入之又流十五里有巴拉銀水自北入之又流三百四十里有戈什玉簪河自西北入之又流五十里有伊古拉引水合別疊得意水自北入之又流四十里有沙圖水自北入之又云喀克善山今詢之各部落僉稱由廓厦爾特山立恰爾自西往東至喀喇賽一帶山岡接連袤延里百里統稱之曰喀爾善其稱廓厦爾特則發源之初也

又東畢底爾河逕烏什城南納柳樹泉水東流其分支北流逕烏什北爲托什罕河

泉在小烏什東南阿里托哈之西新疆圖說柳樹泉在城南二十里其源出山溝泉水東南流二十里入畢底爾河又東流經蘇克提莊克其達莊伯什勒克莊之南又東經牙克莊南至提吐薩拉克莊北入阿克蘇境水道記畢底爾河又東南流十餘里至提吐薩拉克莊北西至烏什城九十里出烏什境入阿克蘇境是爲托什干河回語謂兔爲托什干按畢底爾河經烏什南納柳樹泉水東下入阿克蘇境其經流也其胡什塔哈東南分枝折向北流者爲托什干河分界日記由斯雅克西行六十里渡大河水南流楊柳夾道地名托什罕卽此河下游在烏什東正南流入阿克蘇境漸向東南流矣

托什干河經烏什北又分數支俱東北流

畢底爾河至烏什西南經胡什塔哈東分三支初東北流中一

支寬深爲托什干河正流一支近烏什城北經買立子皮川各莊之北復分二支至托克遜東南洋海之南入托什干河一作胡魯克托什干河卽吉馬水也張氏圖說吉馬水在烏什城北二十五里其源從畢底爾河分支東流一百三十里乃與畢底爾河會一支經托什干河之北東北流復分二支南支曰合什烏克河經入吉馬克莊北東流入托什干河北支東流至塔立泉東北又分二支夾麻札泉東流至馬廠莊北復合烏什新圖謂之墨底爾河卽西域圖志之敖爾他克齊謬斯騰張圖之馬廠水也西域圖志敖爾他克齊謬斯騰回語謬斯騰濬成之河也在托什干達里雅北北山諸水咸滙於是分流南出卽托什干新疆圖說馬廠水在烏什城北四十里其源從吉馬水分支東流一百餘里仍與吉馬水會卽勘界日記哈拉克巴河也

編案

水注既會東南流經和闐莊東南布漢莊西南入於托什干河又

畢底爾河其正枝水折而東北流二十餘里河分兩道其正水

東流五十里經烏什城北又東流一百二十里至布漢莊南入溫宿州境其支河北流五十里又分二支一支循城北各莊東流一百二十餘里至洋海地方仍入於大河合流一支循城北各卡倫東流一百二十里至苦屈莊與枝水合流按畢底爾河東北流分支繞烏什北最爲紛歧除托什干正流外其餘皆民間所開渠道以溉田久則與河相混竟不可辨不僅敖爾他克齊譟斯騰爲濬成之河也

可可容水 新疆圖說可可容水在城西北一百八十里其源出奇里克布魯特部落北山南流一百一十餘里出山谷伏於戈壁按水出可可容達坂南麓

貢古魯水 新疆圖說在城北二百里其源出奇里克布魯特部落北山南流一百里至窩哈塔石伏於山溝亂石中時隱時現按此水出貢古魯達坂南麓

噶吉水 新疆圖說在城東北一百里其源出奇里克布魯特

部落北山南流一百二十餘里至舊卡又流一十餘里伏於戈壁接噶吉水出喀伊車山南麓

英阿瓦特水 新疆圖說在城東北一百五十里其源出奇里克布魯特部落北喀伊車山口南流一百里至卡又流五十里出山口伏於戈壁按卡卽英阿特卡在水之西

臻丹水 新疆圖說在城東北二百里其源出奇里克布魯特部落北山南流一百三十餘里出山口伏於戈壁按臻丹一作珍旦出達坂西南

以上烏什境內小水

托什干河合支水東南流畢底爾河自西來匯又東流入溫宿境爲阿克蘇河

阿克蘇河源出托什罕河西域圖志阿克蘇郭勒在阿克蘇南四十里自北山之呼木阿里郭勒托什干達里雅東南流過阿克蘇西孔道百餘里合流爲阿克蘇郭勒新疆識略阿克蘇河

出喀克善山是爲畢底爾河水道記烏什西北有葱嶺支山曰喀克善山阿克蘇西支發焉新疆圖說托什罕河在城南四十里其源由烏什布漢莊入境東流一百四十里與瑚瑪那克河會是爲阿克蘇河

又東分支南流爲艾柯爾河又東南流爲渾把什河

水道記西支南流經艾柯爾莊爲東艾柯爾河又南流至渾巴什軍台西南三十里折而東南流經伯什阿里克莊南復東南流而與其東支匯徐氏以阿克蘇河爲東支艾柯爾河爲西支今按阿克蘇河入溫宿境東流分支南流經塞勒蘇之西又南經渾巴什驛西南折向東南流經渾巴什莊南是爲渾巴什河又東南流經伯什勒克莊南阿瓦提莊北又東經鐵灣南又東經阿音柯莊北又東約七十里與阿克蘇河匯溫宿府鄉土志城南大河曰渾巴什河卽瑚瑪喇克河發於溫宿西北之楚克爾山南流至縣屬黨巴村與烏什托什干河會入府境鄉土志

以托什干河屬之烏什境極是惟以渾巴什河爲瑚瑪喇克河已覺源流相混又以城南大河爲渾巴什河而置阿克蘇河於不言與從前圖經均不合且渾巴什河以渾巴什莊得名鄉土志莊在城南七十里其莊距大河遠距支河近自以城南大河爲阿克蘇河西志而以水道記所稱西支艾柯爾下流爲渾巴什河庶大河支河各得主名新圖以艾柯爾支河爲渠道聞之士人云每年夏季渾巴什各莊需水卽由官將大河築壩遏水盡入艾柯爾河以溉地秋後穀熟而後啟壩放水還大河南北疆凡一河而支派紛歧者率皆農民引水之渠道也新圖不謬阿克蘇河又東南流瑚瑪喇克河自西北來注之

瑚瑪喇克河在溫宿城西四十里有三源俱發阿克蘇北山一源出木素爾達坂南罕騰格里騰格里山西麓薩瓦巴齊山東南麓西南流爲固洛克水卽墨爾根郭勒也西域圖志庫克墨爾根郭勒源出薩瓦布齊鄂拉在阿克蘇北百餘里南流入呼

木阿里郭勒張氏圖說固洛克水在城北一百三十里其源出
木素達巴冰山西南流二百八十里與瑚瑪那克河會一源出
烏西拉克山南麓西南流新疆圖說謂之雅爾拉克水卽特木
爾烏蘇郭勒也西域圖志特木爾烏蘇郭勒源出庫克墨爾根
郭勒西一百里北山下東南流入呼木阿里克郭勒西南流至
庫木什阿塔麻札西北與固洛克水滙東南流至溫宿正西入
瑚瑪那克河一源出克里拾可克引西北數小水合而西南流
屈曲衆山之間張圖謂之坤衣洛克水出山合流爲瑚瑪那克
河卽呼木阿里克郭勒也西域圖志云呼木那里克郭勒在阿
克蘇城西三十里承庫克墨爾根特木爾烏蘇二水合而南流
支派非一並入托什干達里雅新疆圖說瑚瑪那克河有四源
曰固洛克水曰雅爾拉克水曰坤衣洛克水均西南流至庫木
什阿塔麻札西合爲一水折而東南流一百里至城西與瑚瑪
拉克河會又流五十里入托什罕河水道記阿克蘇河東支發

楚克達爾山爲瑚瑪喇克河新疆識畧謂卽特穆爾蘇水按瑚瑪喇克河本三源西域圖志僅得二源張圖謂四源而所述亦僅得其三勘界日記由阿克蘇向西行十餘里渡橋過清水小河名塘納哈克河又卅里渡大河名庫尼拉克卽瑚瑪拉克河也於水道記由阿克蘇西行亂茲二流以渡語合又分界圖罕騰格里山巔西南山峽中有五水合流指爲阿克蘇河源西北一水爲瑚木里爾克下流爲瑚瑪拉河卽瑚瑪那克之初源也又東湯那哈克河自北來注之

湯那哈克卽勘界日記之塘納哈克清水河也源出溫宿西北喬塔山谷中泉水湧出新疆識畧瑚瑪喇克河卽特穆爾蘇水東流八十里庫車爾蘇來會卽湯那哈克河也水道記瑚瑪喇克河南流八十里有湯那哈克河自阿克蘇城北六泉並發同南流來灌新疆圖說河在溫宿城南半里其源出城西北喬塔地方山谷中東南流八十里有賽里木水自北來入之又流三

十五里至新城南又流一百四十里至哈拉塔莊與楚克達爾河會水道記畢底爾河出烏什境入阿克蘇境是爲托什干河又云渾巴什河東南流經渾巴什莊北是爲楚克達爾河按楚克達爾河應由瑚瑪喇克發源楚克達爾得名新疆圖說謂瑚瑪喇克又流五十里與托什干河會又流二百八十里至克木布衣地方爲楚克達爾河則是托什干反在瑚瑪喇克卽會之下將阿克蘇河置於何地總之畢底爾河在烏什西南托什干河在烏什北東南流其尾與畢底爾匯已出烏什入溫宿境矣徐氏謂入阿克蘇境爲托什干河似未審瑚瑪喇克旣入之後應是阿克蘇河正流楚克達爾因發源得名應在溫宿之西新疆圖說置之溫宿東南致佔阿克蘇河本位與徐氏以托什干河在阿克蘇境內同一誤也勘界日記圖於瑚瑪拉河東博斯塔克山西麓一水指爲塘納哈克河入於瑚瑪拉河其地尙在瑚瑪納克河初源距罕騰格里薩瓦巴齊山最近西南至喬塔

叢山間隔相去尙遠非另有一水卽湯那哈克初源之支流也
又東又與支水匯爲哈喇塔勒河

水道記楚克達爾又東南流經伯什阿里克莊北又東南流至
哈喇塔勒莊南

莊在阿克蘇
東南二百里

而與西支匯是爲哈喇塔勒河新疆識

畧二支復合南流經哈拉塔爾莊是爲哈拉塔爾河復南入於
喀什噶爾河與葉爾羌和闐河會按水道記以畢底爾河爲西
支以瑚瑪喇克河爲東支新疆識畧二支所由本也

又東與葱嶺北河會入於塔里木河

水道記哈喇塔勒河南流至噶巴克阿克集北境與葱嶺于闐
河會河源紀畧云會處四水交貫如井欄水經注云北河道溫
宿國南於此枝河右入北河枝河卽阿克蘇河也新疆圖說楚
克達爾河與渾巴什會又流四十里與葉爾羌河會又流四十
里與和闐河會是爲塔里木河按水經注每以二河並行分左
右如葱嶺北河阿克蘇河均自西之東而北河在右阿克蘇河

在左水經注以阿克蘇河爲北河枝流故謂之右入葉爾羌河爲葱嶺南河阿克蘇河東流入於葱嶺北河支河之流已止葉爾羌河尙在北河之南阿克蘇河不能逾北河而先與南河會謂北河與葉爾羌河會則可謂阿克蘇河與葉爾羌河會則不可況于闐河更在南河之南乎

齊蘭水 新疆圖說齊蘭水在溫宿城南三百四十里其源出城西南空渾山峽中南流二十里至克子科卡倫折而東南流四十里經柯爾坪莊南折而東北流五十里分二枝一東流五十里入黃草湖其正枝東流一百六十里入齊蘭草灘

特朗水 新疆圖說特朗水在城東九十里其源出城東北松山南流一百里至札木驛折而西南六十里至則吉里克分陰各莊地畝

哈哈爾拉什水 新疆圖說哈哈爾拉什水在城東三十里其源出城北喬塔東山曲折南流七十餘里陰注本莊地畝

阿瓦克河 新疆圖說阿瓦克河在城東一百六十里其源出城東北哈勒克塔哈亦名別列克山西南流一百四十里有鐵廠水自西北入之折而南流五十里至鹽山口又流五十里至哈拉玉爾滾驛折而東南流四十餘里伏於戈壁

以上溫宿境內小水

按溫宿東北境支水頗多凡匯於木札拉提河者已叙入木札拉提初源茲不再列

塔里木河

溫宿城東南三百里噶巴克阿克集合葱嶺南北河和闐河阿克蘇河四水東流爲塔里木河其南支受和闐河水並東流爲額爾勾河

漢書西域傳南北有大山中央有河其河有兩源一出葱嶺山

一出于闐

即和闐卽塔里木河也

水道提綱作塔里木河或作特里木又作塔里木徐松補註和闐河與

葱嶺南北河既合經阿克蘇城南

西域圖志作東南三百里

有阿克蘇河自北

西北

來會乃合而東流是爲塔里木河傳言兩源者葱嶺爲正源兼

南北兩河言阿克蘇爲支源皆可謂出於葱嶺故省言之耳

下加

一山字見其河源紀畧云會處四水交貫如井欄西域圖志云塔里

木郭勒西承喀什噶爾葉爾羌于闐諸河爲古河源合流東注

之始皆可印證惟徐氏補註言克勒底雅河四安自南來會水道

記言克勒底雅河北流經城東克星三百里入大河塔里徧攷新圖

克里雅河自庫洛木北流入沙而伏鄉土志謂自古不入大河

果如徐說是四水之外又添克里雅一源何以圖經不載况以

今地理考之實未嘗入大河耶新疆識略引通典于闐河北流

七百里入計戍水遂以計戍水爲今之塔里木河引北魏書龜

茲國南二百八十里有大河東流號計戍水爲證水道記則以

計戍水爲額爾勾河西域圖志云龜茲國南計戍水與今額爾

勾郭勒北距庫車里數相合則並因計戍水而以庫車東南大

河爲額爾勾河攷魏書西域傳于闐城東二十里有大水北流

號樹枝水卽黃河也一名計式水計式計戍一音之轉古今圖籍皆以玉璫哈什當之魏書兼以塔里木爲計戍水者或因玉璫哈什爲和闐河之上源和闐河又爲塔里木之上源故一名兩用古時圖史荒畧容有是稱不知已蹈源流混同之弊至指計戍水爲額爾勾河並以爲在庫車東南尤多不合嘗攷額爾勾河舊圖紛歧莫衷一是西域圖志天山南路第二圖見卷四混塔里木額爾勾兩河爲一幹而以沙雅爾城西南大河爲塔里木東南大河爲額爾勾大清一統輿圖則以西南爲額爾勾東南爲塔里木水道記羅布淖爾所受水第五圖與一統輿圖同圖志言塔里木郭勒在阿克蘇東南三百里會四水合而東流六百餘里統名塔里木郭勒又東入額爾勾郭勒又東入羅布淖爾又云額爾勾郭勒在庫車東南西承烏恰特達里雅即前千河額什克巴什郭勒合而東流爲額爾勾郭勒又東流六百里北會海都郭勒即前又東二百廿里入羅布淖爾水道記云東過布古

斯孔郭爾郭境北爲額爾勾河又東過沙雅爾城南又東爲塔里木河又云布古斯孔郭爾郭地在額里齊城即今和東北五百餘里距噶巴克巴集克近百里其境南皆沙磧中有大山綿互沙圖圖嶺支峯也大河逕其北爲額爾勾河綜上諸圖說以今地理證之有可斷定者二可疑議者二夫古今測望最可憑者莫如經緯度案布古斯孔郭爾郭極四十度廿五分西三十六度廿分額爾勾河在其境北以今圖考之當在斯南相距應不甚遠沙雅爾城極四十度五十五分西三十四度十五分以緯綫準之額爾勾當在沙雅西南不當在東南此圖志之誤可斷定者一也方位如是則所謂西承烏恰特額什克巴什二水與北會海都之說當屬諸塔里木不當屬諸額爾勾况額爾勾在西南彼上游所承之水安能決而之西以入之復決而之東以會之耶此圖志之誤可斷定者二也然額爾勾雖在西南究與塔里木同屬一幹乎仰別爲一幹乎此所當攷辨者也夫四水交會合而東流

爲塔里木河古今圖籍都無異說若果上游爲額爾勾下游爲塔里木則應云四水會合東流爲額爾勾河又東入塔里木河不當徑云東流爲塔里木河矣此可疑議者一也塔里木河爲南疆第一河流古今傳註多以大河名之水道記云大河逕其北爲額爾勾河所謂大河者顯係指塔里木河而言旣云逕其北則額爾勾河必在大河之南可知如以額爾勾卽爲塔里木之上游是兩河同屬一幹則逕北之大河安所指乎此可疑議者二也案新圖塔里木河自噶巴克阿克集上源迤北折東過布古斯孔郭爾郭東流至橫木河灘入沙雅南境額爾勾河則在塔里木之南和闐河之東橫出一支其尾流偏沙雅之東南遇沙而伏與一統輿圖絕不相合竊謂以今證古塔里木河西會四水東注蒲昌延袤二千餘里同流共貫今古不殊卽水經注所謂北河也額爾勾河古爲大水今爲支流卽水經注所謂北河自歧沙東分南河者也

北河南河於下文羅布神廟條下再發明之

古時兩河正源必同

出葱嶺和闐諸水特塔里木河今猶兼會四水額爾勾河今祇受和闐一水形勢變遷失其故道古時上源諸水浩瀚東注至阿克蘇之南和闐之北匯爲大河因沙山綿亙其間以分其勢故釀爲二河水道記準語謂河流迴抱爲額爾勾其與塔里木河必有相爲迴抱之勢水經注南河會流東逝通爲注賓河注賓卽今之塔里木而南河無可指名應屬額爾勾無疑肅州新志云羅布淖爾方圓數百里塔里木河自西南來正西額爾勾河自正西來離海都河自西北來咸會於此雖其方位不盡相合猶可見兩河平行東下之跡祇緣沙障遏流故額爾勾一水不能與塔里木並行耳然益見二河分流非屬一幹彰彰明矣又案塔里木者回言可耕之地也辛卯侍行記云塔里木河下游羅布各卹當播種時上游庫車迤西城邑遏流入渠河水淺涸難於灌溉至秋始洩水入河又苦泛濫據此推之凡西南上游近水城邑田疇益密則渠澮益多而水勢日漸分流無復昔時

浩大之勢詢諸和闐土人頗言和闐河下流之水時漲時涸竟有時不入大河則以和闐富庶爲南疆之冠故况額爾勾所受水偏於和闐一源爲多而下游又有沙山以障遏之其不得與塔里木同爲大河不亦宜乎

塔里木河東逕沙雅城南渭干河自北來注之又東北入新平境至阿拉里莊南合於渭干南河又東流瀦爲六泊又東南流三百里有開都河自東北流合渭干北河南流來會

塔里木河自溫宿東源經賽拉里克卡倫環流入沙雅境

此土風云如治所西

而三會典輿圖河自溫宿州分二支東流入庫車界經其西南北

支左納橫木河灘水南支亦東流來會是也其北岸自賽拉里克南渡有小徑通於伯什牙克莊南岸傍沙磧草湖湖之大者

曰下和里海子

此海子舊置不載其南爲伯什牙克水

又東合流過特里木卡倫

其南岸有河可通

其北

有鄂根河

加河干河

支水南流入之鄉土志鄂根河東流經沙爾里克

分支南流入於塔里木河會典輿圖東經魁木沙卡倫北

此卡倫地則不在此

河南塔里木 上段西在今 又東流左納渭干河支津水正與此合此為渭干北來

入河之第一支水道記渭干河東南經沙雅爾城北是為鄂根

河回人謂之烏恰特河 內城圖志作烏恰特河 東南行三百五十里經沙哈里

克湖南 即沙爾 又東南五里許折而東至玉古爾莊南入塔里木

河水經注北河 即塔里木 東逕龜茲國南又東左合龜茲川即謂此也

河又東行三百四十里經輪臺南入新平境至鐵里河灘復分

二支 南支之右有地曰加爾木與上橫木河灘是二非一 南支之水瀦為小羅布淖爾 案此土志羅布淖爾有

淖爾在西區新平今圖籍皆未詳及此惟言與西河自東水之北流入焉 淖爾界其西南流為小羅布淖爾與北支合 溢出東行二百里與北支合

又東過河拉里莊南其北有渭干南河東南流入之此為渭干

北來入河之第二支塔里木河至此合二大支水為一東南行

二百里瀦為六泊最北一支為渭干北河上游曰恰陽河下游

曰英氣蓋河鄂根河東分左支也鄉土志鄂根河經沙爾里克

向東流至阿恰中分二支右支東流少南至加衣拉克出界 為沙

東南界 為渭干南河左支東流少北至玉區而梗出界 沙雅爾正東界所

三百五十里

里當歸台西南城臺平頂而後即玉台城水遂起云耳城東北三百二十里為玉台城臺台有南十里為玉台城河其方位與前河合 為渭干北河與南河平行

約五百里中河又注相連北河既東過輪臺南境東流為英氣蓋河瀦

為冲庫海子又東逕穹可力莊有共琦河自北來入之合而東

南流約三百里至阿拉竿入塔里木大河此為渭干北來入河

之第三支水經注龜茲川東南流三分右二水俱東南流注北

河右二水即渭干南北河也共琦河屬開都河下游開都河自

博斯騰淖爾溢出折西南行經庫爾勒回莊為孔雀河其流南

入布它海子又折東南行為共琦河一名又東南與英氣蓋河

合流逕蒲昌城之東地名都拉里先格十八年移蒲昌城南流注塔里木河案塔里木河自渭干南行五十

里英格可力七十里為穹可力七十里古斯拉克九十里都拉里百里哈拉台百里阿拉罕城渭干北河共琦河水匯之處水經注大河又東右會敦薨之

水其水出焉耆之北敦薨之山即今開都河矣塔里木河北岸

支流小水脈絡紛歧最大者為古斯拉克河由南岸所瀦之第

五洄溢出二支經古斯拉克莊合併東北行斜貫共琦河南岸

瀦為小澤所稱孔雀海者也其次為阿拉鐵里木河在古斯拉

克之東南其水亦東北行斜貫渭干北河合共琦河北來之水

迴入大河入諾羌境河與渭河合英格河力莊西南右出數支津並入於沙即右赫之六泊也左出二沙合東北流為黑龍河注於孔香河即古斯拉克河也又東南復左右各出一支

又東南與孔香河合即渭干北河也蓋光河之名不見諸書從都土志以古斯拉克莊名其水為當其云孔香河者即渭干北河合共琦河北來之水乃孔香河之下流又若謂為共琦河必分則耳

又東南入諾羌境經流二百餘里滙於羅布淖爾

塔里木河既會渭干開都兩河自阿拉罕東南流八十里托孔

一作九十里和兒罕四十里七克里克莊莊南四十里羅布郎郎

在羅布淖爾之西畔河流逕其東入於淖爾古稱蒲昌海一名

鹽澤又曰勃澤曰輔日海曰牢蘭海曰臨海曰捕魚兒海其異

名也東西二百餘里南北百餘里一作書作廣袤三百里山海經謂其水注於引作其水

停居冬夏不增減大淖爾之旁小淖爾環之北則圓淖爾三無

名南則方橢淖爾四一日鄂爾溝海圖一日巴哈噶遜努奇圖

色欽一日努奇圖杭一日塔里木池西南距縣城八十里漢屬

樓蘭國地水經注澤在樓蘭國北扞泥城今樓蘭縣北八十里羅布郎一帶即古扞泥城也傳行經焉

在焉彼俗謂之牢蘭海是也又水經注南北二河同流注澤惟於

南河繫以牢蘭海北河下繫以蒲昌海遂啟後人之疑胡渭禹貢雖指直以爲二海固屬謬誤徐松水道記不考古時南北河分行舊跡而謂一川渠并振古如茲遽疑鄭氏爲未審李光庭非之又不能確指南北河分趨故道而定以今名皆非確解細繹水經所叙河源分南北二大支源出葱嶺山者謂之北河自姑墨以西兼喀什噶爾葉爾羌兩河言姑墨以東則指塔里木河言非若後人專以喀什噶爾爲北河葉爾羌爲南河也源出于閩南山者謂之南河和闐河東北流之水卽今額爾勾河也何以證之水經之叙北河曰北河逕疏勒城下又東逕莎車國南又東逕溫宿國南又東逕姑墨國南姑墨川注之此以葱嶺北河爲主兼會葱嶺南河又合於阿克蘇河也其下文曰其水又東南流右注北波河又東逕龜茲國南又東左合龜茲川又東右會敦薨水此以塔里木爲北河兼會渭干開都河也下文曰河水又東逕墨山國南又東逕注賓城南又東逕樓蘭城南

而東注於泐澤卽經所謂蒲海此言北河東經之道墨山國地

西域圖志以爲在哈勒噶爾璊即哈爾濱滿洲軍臺又作哈爾璊今哈滿濟東境

西疆通志註云兩河自海新源達南以流數十里界開都及又南則流百里爲新南河入山經哈勒噶爾璊軍臺西流爲哈爾滿濟東境在之南注賓城更在

其東當係今古斯拉克莊之東都拉里左右地再東則爲樓蘭

國地矣故知水經之北河自姑墨以東皆指塔里木河言之也

國志注川之東南流水分右二水俱東南流注北河等句尤爲顯證其叙南河曰南河又東逕于閼國北又東逕

扞彌國北又東逕精絕國北又東逕且末國北又東右會阿耨

達大水于闐今之和闐扞彌今克里雅城自克里雅東北行六

百里至安多羅爲古戎盧國在精絕南四日行漢西域傳渠犂

南接精絕今塔里木河北岸爲渠犂故地是渠犂精絕之間以

河爲界也然水經不曰北河而曰南河者當非指塔里木河而

言必北河之南更有所謂南河者也傳言且末西通精絕二千

里自安多羅東北行至卡牆僅四百餘里又東北行六百里渡

卡牆河共約及千里則且末當更在卡牆河之東北卡牆河阿

阿耨達水也

水入且末城之北阿耨達水自且末城東北流經曲千餘里入羅布泊其水入且末城之北阿耨達水自且末城東北流經曲千餘里入羅布泊其

故下文曰其水北流逕且末南山又北逕且末城西此指阿耨
達水而言下文又曰且末河東北流逕且末北又流而左會南
河上言南河右會阿耨達水此言且末河左會南河可見阿耨
達是其總名其流逕且末國後乃名爲且末河右會左會義爲
迴環實則阿耨達支水左流會於南河其大股幹水仍北流自
入澤非與南河合流同入澤觀酈氏引釋氏西域記阿耨達山
西北有大水北流注牢蘭海其義自見惟南河則通於北河合
而入澤故下文又曰會流東逝通爲注賓河注賓河又東逕鄯
善國北其水東注澤澤在樓蘭國北扞泥城彼俗謂爲牢蘭海
會流者會且末河之流也通爲注賓河者卽與逕注賓城南之
北河相通也旣通之後兩河遂合故下文不復再言南河而提
出注賓河三字以見南河至此已合於北河而同注澤也其叙
南河北河始分之跡曰釋氏西域記南河自于闐於東北三千

里至鄯善入牢蘭海于闐東北卽今和闐河北流至布古斯孔

郭爾郭處此南河東北流之始也下文又曰北河自歧沙東分

南河卽釋氏西域記所謂二支北流途屈茨卽龜茲倭夷卽焉耆禪善

今疏勒入牢蘭海此以北河爲塔里木河蓋四水交會滙於北河

因歧沙阻之故東分爲南河曰二支北流同逕龜茲焉耆鄯善

者已顯言南北二河並流合於鄯善之跡與上文南河東逕于

闐扞彌精絕且末諸國北東通爲注賓河又東逕鄯善國北而

注澤等語一一脗合可見古時塔里木河之南別有一大河平

行東下至今之婁羌北界而合兩河首尾勢如迴抱準語謂河

流迴抱爲額爾勾然則定額爾勾河爲古之南河應可無疑徐

松西域傳補註謂傳於山有傍南山北山之別於河但曰波河

不分南北明西域中央只一大河而疑水經注南河北河各自

注澤之文爲誤案漢書云白玉門陽關出西域有兩道從鄯善

傍南山北今吐魯波河西行至莎車爲南道自車師前王庭今吐魯隨

北山波河西行至疏勒爲北道古時于闐諸山通稱南山曰傍南山北者其故道當在扞彌精絕且末之北與水經南河河流宛合後人以北字連下波河讀致多謬誤北山波河故道爲今輪臺庫車等地卽塔里木河北岸玩其句法以北河屬北山南河屬南山分晰顯然徐氏謂不分南北於班書文義尙少領會夫漢魏至今二千餘年南河漸爲沙山所壅其流日淤日涸乾嘉以後下流益短後人求其跡而不得或以卡牆河當之已失古之南河又昧於迴抱之義至以塔里木下游爲額爾勾河則并額爾勾而亦失之去古逾遠而彌失其眞非卽酈氏之說而鈎貫之何以發千古之疑而通其蘊哉

又伏流東南千五百里再出積石爲黃河

羅布淖爾爲黃河初源伏流之說由來最古山海經不周之山東望渤澤河水之所潛其源渾渾泡泡淮南墜形訓河水出崑崙東北陬貫渤海指入禹所導積石山水經宗之自唐杜佑宋

歐陽忞元潘昂霄不取其說齊召南作水道提綱至斥水經誤
依舊聞爲非紛紜聚訟未有定論案史記大宛傳漢使窮河源
源出于賓其山多玉石采來天子案古圖書名河所出山曰崑
崙又曰于賓水東流注鹽澤鹽澤潛行地下其南則河源出焉
多玉石河注中國漢書西域傳鹽澤潛行地下南出積石爲中
國河秦漢以後古圖書已不可得見然山海經淮南多本古籍
馬班所引必非無徵卽以今地理釋之產玉之山多出于閩西
圖以卡拉胡魯木達坂爲崑崙正幹與古圖正合羅布淖爾恰
當達坂之東北達坂山脈綿亙東入青海界結爲巴顏哈喇山
巴爾布哈山阿克塔沁山三山鼎峙總名庫爾坤山距淖爾東
南千五百里自淖爾伏流南行至巴顏哈喇山之東麓名曰阿
勒坦噶達素齊老

蒙古語謂黃金曰阿勒坦北極星曰噶
達素石曰齊老蓋以石像北極星度

山下飛流噴薄色如黃

金名曰阿勒坦郭勒冉東北流百餘里有泉千百燦如列星名
曰星宿海蒙語謂之鄂敦塔拉番語謂之梭羅木元史稱爲火

敦腦兒是爲黃河之重源史言其南則河源出焉蓋指此也東出鄂敦塔拉東南流百三十里瀦爲札凌淖爾再東南流折而南五十里瀦爲鄂凌淖爾自淖爾東北出東流五十里折而東南百四十里又南流二百六十里折而東南三百里逕阿木尼瑪勒占木遜山南麓又東流折北又折而西北凡千六百里逕山之東麓迄於憐渡口山是爲古大積石山黃河自此始大卽夏禹導河處康熙四十三年侍衛拉錫始探河源乾隆四十七年侍衛阿彌達再履其地於是黃河源流繚繞曲折朗若列眉光緒二十八年置諾羌縣縣令曾遣人隨纏民越屈莽山入西甯歸詢其經行之路高下屈曲皆沿河溪行或淺水或涸疑卽古來南出積石故道古人以葱嶺及于賓南山之水合流東注蒲昌爲黃河初源允爲不刊惟伏流潛源之說近人尙有疑之者其所持論亦近有理此非得精輿地學者履行探測攷驗地質未易遽明然觀近年機器發明雖泐石重崖鑿深三百丈無

不得水是水不能穿土石之說實不足舉以發難且安知古人

非躬親勘測而云然邪姑存其說以俟世之知言者

近人著河海源流錄其說云河源出大

石山在河海西南外麓中曰星宿海自漢以來深考故漢書曰星宿海在河海之南

所出咸泉咸湖皆有山名可登水不能達山而伏流也天山南北凡衆水所歸有入無出者所歸之海子如池化白家海子

鹹西巴爾庫勒泊按定齊里木泊塔城烏爾其什泊又拉克庫爾之北皆鹹泉流不竭不涸與海同體詢之士人即謂有伏

流復出者不過近在百數十里內之湖也涼州人積石九千五百餘里以平沙阻其山何以能出而得土能化水

理不可易也外河奔流遇沙嶺則漸乾遇土壅則束而納之行乎地中水能穿沙不能穿土與石若伏流地中不過

百數十里必有突出而爲泉者凡河之堤岸雖一畝穴泄注既久必至涸涸安能伏乎千餘里較高麗卑而入之常道之間不

一見也此說始於山海經河水所經一語漢人祖其說昔人已可疑之但去轉轉其言又云伏流之說或以神祕窮納衆流

入而不出亦無地誠爲疑不知因大風而收納地之水皆入而不出何獨於此而疑之蓋衆水皆爲日力所耗水面

所以生也以吾觀至大積石一訪河源觀水有窮必能更從他源伏流之說

阿不旦海子 阿不旦海子在羅布淖爾之東中有阿不旦莊

距婁羌縣城東偏北百八十里其西南有小河四一曰凹石峽

河一曰凹乾石峽乾河一曰婁羌河一曰密遠河皆發源南山

東北行八百餘里入阿不旦海子由海子溢出東南流入於沙

碩洛浣水 碩洛浣水爲小泊在阿不旦海子之東泊之南曰

葛斯池科干水曰列嶺出莽水曰怕夏勒可水曰特各立可水

曰庫木塔什水其西南曰卡克里克水曰甜水泉水子水並南流

入於沙

以上媼羌小水

渭干河

木札拉提河 色別河

渭干河卽古西川水水有二源西源發木素爾嶺木素爾河出焉
河水西南流經圖巴喇特軍臺東折而東南流出察爾齊克軍臺
北是爲木札拉提河

亦道記作木頭喇特河
之說略作木頭喇特

木素爾嶺卽唐之凌山譯言冰達坂在伊犁烏什之間葱嶺北
原也西域圖志嶺在汗騰格里鄂拉西南四百里圖斯庫勒南
拜城北回疆風土記他木哈他什臺

在道之南一作
塔木哈他什

河流浩瀚東南長

流五千餘里支分派別盡歸賀卜諾爾

四圖布

水道記嶺下洪流

噴薄厥聲殷雷色白如汁謂之白龍口西爲塔木噶塔什軍臺
臺西五里許湧泉如墨謂之黑龍口二水交匯於軍臺南是爲
木素爾河卽渭干河之西源也木素爾河出嶺峽西南流八十
里經瑚斯岡托海軍臺東又南流五十里經圖巴喇特軍臺東

乃折而東南行百餘里經滴水崖沙磧北又數十里經諾依古特莊南察爾齊克軍臺北是爲木咱喇特河與今圖合

木札拉提河東經鄂依斯塘北鐵敏水南流注之又經蘇巴什莊北東流爲銅廠河又東逕拜城南特拉布覺克河經城西喀拉蘇河經城東並南流來會

木札拉提河自逕察爾齊克軍臺折而東行其北有三小水發於塔爾齊山合而南流來入之又東行有二小水發於拜城西北山麓亦合而南流來入之又東過鄂依斯塘北有鐵敏水發於呀色里敏山亦南流來入之又東逕拜城南城西北有特拉布覺克水發於提札哈依胡山東北有喀拉蘇水發於楚里塔哈山並南流入於河水道記云木咱喇特河經鄂依斯塔克齊克軍臺北折南經雅爾幹莊是爲雅爾幹河今河正逕溫巴什銅廠之北當卽銅廠河也又云河經莊折而東有哈布薩朗河自北來匯哈布薩朗卽特拉布覺克之變音源發拜城西北山

南流分三支西二支南入雅爾幹河長八十里東支流數里後
又分爲二西引者南流經拜城西匯西二支同入雅爾幹河東
引者東南流匯哈喇烏蘇水經拜城東爲木札特河而南入雅
爾幹河新疆圖說喀喇烏蘇卽喀拉蘇亦名克克蘇源發拜城
東北七十里之楚里塔哈冰山與溫宿冰達坂連界距特拉布
覺克河源東近百里南流十餘里分二支西支西南流入特拉
布覺克河東支東南流百二十里經賽里木城南布幹莊與木
札拉提河會新會典圖以特拉布覺克河東南流經縣治東來
注是失其西引一支又但言喀拉蘇水東南流過賽里木驛來
注而不言西南入特拉布覺克一支亦少疏漏今依水道記新

疆圖說補正

東源發額什克巴什山西南麓及南麓並西南流是爲赫色勒河
其西百里爲阿勒呼蘇山伯什克勒克水出其南麓西流經阿爾
通伙什卡倫折東南流至尼札爾卡倫與赫色勒河會

西域圖志額什克巴什鄂拉在汗騰格里鄂拉南二百里哈喇庫勒發源東南麓赫色勒郭勒東一源出西南麓又東一源出南麓阿勒坦呼蘇鄂拉在額什克巴什鄂拉西百餘里赫色勒西一源出其南麓水道記渭干東源爲赫色勒河三支並發西支發阿勒坦呼蘇山東二支發額什克巴什山額什克巴什者所謂白山也一名阿羯山山勢蜿蜒庫車伊犁喀喇沙爾三面銜界設卡倫二一日阿爾通伏什一日呢咱爾阿塔即尼札斯十皆在赫色勒河源西岸新疆圖說伯什克勒克水源出阿克達坂西流一百七十里至伯什克勒克卡出峽南二十里折而東南流至尼札爾卡與和色爾河會和色爾河即和色爾河之轉音又云和色爾河源出拜城東北四百五十里之大達巴尼嶺西流三十里至伯什克擺草場又西流一百六十五里至阿爾通伏什卡折而南流四十里至尼札爾卡又西南流至和色爾驛折而南流二十里至明呂山口與渭干河會觀上諸說則知赫色勒河東二源出額什克

巴克山其西一源出阿勒坦呼蘇山卽所謂阿克達坂東距額什克巴克近百餘里東北與大達尼巴相連上下約三十里蓋一山也阿爾通伙什卽阿勒坦呼蘇之變音蓋以山名名其卡尤足爲阿克嶺卽阿勒坦呼蘇山之證伯什克勒克水卽赫色勒西源也近人多誤爲二山因辨正之

赫色勒河又南流過赫色勒驛經千佛巖西銅廠河自西來會合流出明呂山口是爲渭干河

水道記赫色勒河二源既匯南行八十里什和坦爾山水自東北來沙爾達朗水自東來又匯西南行七十餘里經赫色勒軍臺西今和色又南行三十餘里經千佛洞巖下雅爾幹河即渭河來匯

是爲渭干河案渭干西域圖志作烏恰克達里雅卽古龜茲西川水也水經注龜茲川水有二源西源出北大山南其水南流逕赤沙山又出山東南流枝水左派所稱北大山南者卽額什巴克什山南流逕赤沙山者卽今托和旦嶺及丁谷山西麓托

和旦嶺俗名鹽山口水道記以赤沙山爲阿克蘇之鹽山非也
阿克蘇鹽山名圖格哈納嶺尙在木素爾嶺西四十里經言西
源者乃西川之源非指木素爾之西源言觀其北大山下引釋
氏西域記屈茨北二百里有山夜則火光晝日但煙及赤沙山
下引國北四十里山上有寺名雀離大清淨等文方位自見又
出山東南流枝水左派者乃出南山谷口折東南流枝水左引
入大河也

河出庫車西南百里折東南流逕沙雅城北又東分支南流注於
塔里木河又東入輪臺境分二支一東北流爲渭干北河一東南
流爲渭干南河皆會塔里木河入羅布淖爾

渭干河寬廣二十餘丈支派紛歧下流周溉千百里鄉土志云
河出丁谷山西麓距庫車西南百里折東南流分爲數支西引
者出塔克里克莊偏西南流灌溉十餘莊名塔克里克水卽水
道記之塔什里克渠也其水入沙而伏東引者出庫車城南分

二支北一支名阿朗水逕亮格爾莊之北其水偏東北流亦入沙而伏南一支自英爾瓦特莊橫出東流名胡布水其水亦偏東北流入於爾漫柯海子河又南行折而東經以介奇莊北又東經勒黨莊北又東南經沙雅城北又東南經薩牙巴克莊北回人指爲鄂根河卽此河也又自勒黨莊前溢出一支名勒黨水南流入沙而伏河又自薩牙巴克莊東行經沙爾里克湖南分支折而南流入塔里木大河河又出沙爾里克東行經阿治地方復分爲二支一東流少南至加衣拉克出界距沙雅城三百五十里是爲渭干南河一東流少北至玉區而梗出界距沙雅城三百四十里是爲渭干北河南河東行至河拉里莊折而南合於塔里木河北河上游一名恰陽河其下游一名英氣蓋河與南河平行五百里瀦爲冲庫海子自海子溢出東流逕穹可力莊東北有共琦河南流來會同入塔里木河並東南注羅布淖爾其餘小水支流引灌沙雅城南數十回莊與水道記所

列莊名互有異同茲不備載

阿洛浣水 阿洛浣水在沙雅縣西偏上流爲苦水自拜城西
南溫宿東南交界之阿里拉塔哈莊向東流至鐵吉克卡倫南
澮爲土子洛可蘇泊止不流

下和里海子 下和里海子在沙雅西南境塔里木河逕其北
東西長南北狹寬廣約五六十里不與他水通

伯什牙克水 伯什牙克水以伯什牙克莊得名在下和里海
之南自溫宿東入界東流經沙雅南境又東流入於沙案此疑
卽古南河故道昔稱爲額爾勾河者也其源自和闐河東北塔
里木河西南橫出一支又南爲乾河其流時漲時縮水大時長
可數百里尾流於塔里木卡舊址之南而止額爾勾之名旣失
遑論南河故近人以其莊名名之耳舊籍無稱姑存其說以志
闕疑

以上沙雅支水

龍口河

新爾達特河 烏哈爾薩依河 羅斯巴什河

龍口河卽古東川水一名庫克納克河

又作加克納克

源出庫車東北迭拉

爾達坂西南流經庫克納克卡倫西有塔里克水自其西北來南

流注之

鄉土志北山之水南流爲龍口河庫車城東水源所出蓋總茲

東川水正源也案龍口河卽庫克納克河西域圖志庫克納克

達巴在愛呼木什塔克西五十里額什克巴什郭勒發源南麓

山脈自額什克巴什分支東行六十里至此此誤也額什克巴

什山在庫車北偏西百里庫克納克嶺在北偏東五百六十里

迭拉爾達坂又在庫克納克之北

通曰圖志一山脈名後曰圖志一山脈有上下之分未知孰是

雖統屬汗

騰格里山一脈相連而距地尙遙且額什克巴什郭勒宜屬諸

額什克巴什山不當轉屬諸庫克納克山也山水異名反滋疑

寶圖志又言額什克巴什郭勒在托和爾西南五十二里橫當

孔道自北出庫克納克哈喇庫勒二水匯而南流卽名此河案

其方位係指密爾彥特河言新會典圖密爾彥特河卽庫車河
一曰額什克巴什河蓋沿圖志之譌也迭拉爾達坂之西爲阿
爾齊嶺新疆圖說塔里克水在庫車城東北二百三十里源出
阿爾齊達坂南流一百里至庫克納克卡與東川河會

河又西南流經拜吉卡倫托克拉蘇水自其北來南流注之

新疆圖說托克拉蘇水在庫車城東北一百七十里源出泰來
買提達坂南流一百里至拜吉卡與東川河會鄉土志泰來買
提嶺在庫車城出二百五十里與焉耆府屬之裕勒都斯連界
又西南流十里克牙衣拉克水自其西來東流入之

新疆圖說克牙衣拉克水在庫車城東北一百六十里源出城
北而什達坂東流九十里至拜吉卡與東川河會案克牙衣拉
克水卽哈喇庫勒水也西域圖志哈喇庫勒源出額什克巴什
鄂拉東麓東有庫克納克郭勒西南流會哈喇庫勒入額什克
巴什郭勒蓋而什達坂屬額什喀巴什山東界一幹相連特此

水東流而赫色勒水西南流是以分耳

又西南流八十里逕銅廠山口朵托水自其西來東流入之

新疆圖說朵托水在庫車城北八十里源出城北朵托山曲折東流至銅廠山口與東川河會案銅廠山在河之東岸溫巴什莊之東北距庫車城北一百五十里水道記庫克訥克嶺下水三支南流庫克訥克卡倫西又西南流經草嶺西又西南經石嶺西又西南至博勒齊爾山後左右分注一經其右二經其左二里許匯爲一西南流經銅廠山西博勒齊爾山即阿爾齊達坂山後舊設博勒齊爾卡倫卽今拜吉卡也一經其右者指塔里克水言二經其左者指托克拉蘇克牙衣拉克二水言所謂嶺下水三支也

左二水交會於拜吉卡南北相距約十里距齊二里許者從誤

一水自西來會記漏載今據新疆圖說補入

河又西南流經破城東分流三支西支南流逕庫車城東至大可莊折而東流是爲密爾彥特河

密爾彥特河土人謂之城上河卽西域圖志之額什克巴什郭勒也鄉土志龍口河流爲三支分渠十餘道及東鄉泉二道注蔭東南鄉數十莊距城北十里有破牆一道長五里許相傳爲漢時屯兵之所東去城百數十里爲大戈壁河自破城東偏分一支西流距庫車州城五里許折南流逕州城東門爲城上河水道記密爾彥特河南流經庫車東門水經注所謂枝水入龜茲城者也又南流經達和賴莊東大河即達和之北折而東南流入沙哈里克湖凡百八十餘里

東二支右曰烏哈爾薩依河左曰葉斯巴什河俱南流合密爾彥特河會流東逝潞爲沙爾里克湖

新會典圖云正渠折西

正渠特河

左出一支津歧爲二左曰葉斯巴

什河右曰烏哈爾薩依河皆南流合正渠正渠又西折南經廳治東又南復折東流與北東二支津會又東至廳東南潞爲沙哈里克草湖水道記新疆識略並云密爾彥特河經城東南流

百八十里入沙哈里克湖烏哈爾薩依河亦東南流百八十里入沙哈里克湖惟葉斯巴什河則南流五十餘里入阿提委納克湖與會典輿圖不同案鄉土志龍口河至隨魯莊分爲三支東西分流環抱十數村莊復合流而東瀦爲沙爾里草湖實無葉斯巴什河南入阿提委納克湖明文此爲小異又水經注東川水逕龜茲東北歷赤沙積梨南流枝水右出入龜茲城其水又東南流右會西川枝水又東南流逕于輪臺之東又東南逕烏壘國南又東南注大河大河謂塔里木河也今則東川原委皆不出庫車本境不入大河亦不右會西川西川自入河東川入湖後不復與他水通塞外河流無數十年不變遷者宜從新圖爲是故備及之

意塔拉水 新疆圖說意塔拉水在庫車城東北百一十里源出白司坦山東南流四十里伏於戈壁

巴克蘇克提水 新疆圖說巴克蘇克提水在庫車城東二百

一十里源出東北塔里白山西南流百四十五里至巴克蘇克
提又南流六十里至阿爾巴特驛又流三十里伏於戈壁案此
水卽西域圖志之塔什阿里克郭勒也圖志云塔什阿里克郭
勒源出北山南麓第爾納郭勒卽布告水西六十里阿巴特西南流
百三十里入於巴巴淖爾又案巴巴淖爾一統輿圖作瑪巴赫
薩爾泊新會典圖無之蓋昔有而今涸也

奚里必體里克水 新會典圖奚里必體里克水在巴海蘇水
卽巴克蘇水之西二水會西南流經阿爾巴特驛西南入於沙案西域
圖志奇里什郭勒在塔什阿里克郭勒西五十里奇里什卽奚
里必體里克之省音也

拉依蘇水 新疆圖說拉依蘇水在庫車城東二百六十里源
出托干奇恰山南流百八十里折而東南流二十五里至玉曲
坎卽玉曲而後
輪名西爾坎伏於草湖

以上庫車支水